



新安左田黃氏正宗譜卷三

行狀類

宋

太父宗香公行狀

公諱商伯宗香其字也商出縣尉元和公後元和公創造左田子姓椒實蕃衍世不乏賢公為公權公長子母孺人張氏所生自幼聰敏有至性言行不苟宗老咸器重之一日母病篤公衣不解帶手調湯餌不效情亟焚香告天曰願身減筭以益母年是夕割股饋羹以進而愈入仕為掌書聞鄉里饑饉辭歸傾產以濟貧乏凡有菜色而待活者應手給之無難色卒賴其力以免流離輾轉之患公之所及為居多矣縣令張公以孝廉聞徵辭不就曰嗚呼吾其忍以親病民瘼而竊為名也哉吾盡吾心焉耳夫以親病為名是利其親之病而自為名者也以民瘼為名是利其民之瘼而自為名者也吾弗忍也使親無病而民無瘼吾幸而處其常無可名焉吾心所安能愈親病而蘇民瘼不幸而處其變有可名焉吾心方自若然則何以孝廉稱為吾弗敢也公居家憊憊日以立壠合

族之義為重脩清明祭掃會自父祖而上每歲必集子姓長幼掃墳堂真群坐而享其福若公推公之墓宗家塢祖運幹公墓牌山曾祖崧公墓黃泉塢高祖鑿公塋左田而上遡於柏林墩元和公墓並無缺典公所存過人遠矣公生紹興辛亥不幸卒嘉泰甲子公之至德出天性芳譽在人心固不俟筆而傳誠恐世遠時移口碑或刊遇龍勉嗣家聲實慚祖武然先祖有美而弗知知而弗傳類匪仁孝謹論譏之以俟乞言于有道者于是乎狀

宋寶祐二年乙卯歲次秋七月初六日不肖孫遇龍謹狀

大明

後園黃先生 樞行狀

先生諱樞字子運姓黃氏其先世自晉新安太守公子尋居郡之黃墩傳至唐縣尉元和公居祁門之左田長慶間始居休寧之古林是為敏府石敏生鑒鑒生逢逢生泉泉生釗釗生宋興宋興生宗強宗強生目目生實實生泰泰生子志歷世相傳耕織為業皆潛德弗耀子志生思明明經入仕官至朝議大夫思明生千春官授清州宣議千春生大任同弟入仕授宣議即大任生允清於咸

淳庚午以明經請待貢補允清生方方生君啓讀書積行鄉稱善人如鄉先輩待制鄭公王侍講朱公升史官趙公沔皆與論學切磋友義甚篤君啓娶姚氏生三男先生其主器也自幼天資謹厚蚤歲讀書屬文落筆驚人年甫十五為人師日則訓誨不倦懇懇漸摩夜則焚膏繼晷吾伊達旦比長儀狀偉特舉止從容絕無崖岬與人交接渾是一團和氣前元之季九為仕者各專一經以媒祿利先生始嘗有志於是乃慨然嘆曰聖人有言惟孝友于兄弟施於有政是亦為政棄去時文篤意古學涵浸義理充廣聞見道行于家行乎于鄉無復仕進之志至正丙申浙東宣慰僉都元帥李公克魯進士也以兵鎮黟縣延先生為塾賓方是時龍蛇起陸七曜無光守將以下殺人如麻先生避地里之汪油源禮羅再三謁勉就道既至每與談論莫非正理嘗謂李公曰漢王賀有言吾聞活千人子孫有封吾所活者萬餘人後世其興乎李公由是損威刑鮮寃避越明年丁酉先伯先人稔聞先生德行俾瑜也兄弟受學門下九九年聖朝選一天下比年取士以先生才德終膺大用郡縣逼迫不知其幾不廉好爵竟以疾辭先生恒產雖無郭內郭外之田隱居求志亦有筆歌陋巷之樂事

物旁午不為繁心科斛籌量不一經手田園基址隨二弟分析泰然不較遂築室於後隙之地以居鄉人稱後圃先生蓋其友愛如此片言細行筆不能殫平居所著詩文集千篇藏于家既同里汪氏汪為新安著姓神明之後動檢理家婦道母儀皆可為法先生讀書為學得以卒志皆孺人之助也生子一人安民女二人長適林塘朱敦次適以口程松皆儒家先生生以延祐戊午四月十日辰時歿以洪武丁巳十一月十日寅時不疾而卒享年六十平生恬靜寡慾素衷純實故得令終非偶然也殯於所居之後園也從遊日久以故知先生為詳無溢美也嗚呼世之人讀書千卷帶歲如山勢焰燦天稽其所行不踐所言先生能言於前躬行於後此風此德當於古人中求之不然則千駟之馬萬錢之食詎足稱也然則汶上之閔舞雩之曾先生近之矣先生捐館之明年諭也由御子張孟善舉薦授廣西賓州判官適與廬陵艾公彭同僚艾公由東昌知府謫守南賓執春秋通書法尤工文辭嘗以能記憶先生之行畧為事狀求艾公序而銘諸墓何俾翁也權左江太平府事與艾公隔越千里不能如願今之公文負罪歸來借述如右自揆少賤豈敢踰越然狀其事實門人弟子職也

或者天假良緣得求名公之雜篇以慰九京之思又不可知也

洪武辛酉秋七月甲子門人金瑜彥瑾狀

慶士黃公永安行狀

公諱永安字仕寧行安一號栢墩姓黃氏初在田世家父德誠祖汝賢曾祖顯仁並隱德弗耀高祖遇龍登淳祐庚戌進士蓋自元和縣尉始基左田而詩禮簪纓相傳靡斁即弗仕世守家聲未始不為鄉邦雅望至公生而岐嶷不凡有異氣見者謂非常兒頰長端凝沉毅遇事則果有古人風且當元末流離之季屹然卓越有猷有守而亟自韜抑不少放露其才惟恂恂以敦孝信義持已淑身睦輯鄰里而已嘗慨兵戈恫憊桑柘蕭條而先靈祀典亦復荒落不舉坐是清明拜掃失禮殊甚雨露沾濡孤克交道有人心者寧不動念而一為之所哉于是取商伯公報本故典經理立法振刷人心而照屬之自何小鳩小塘塢親壠而上歲時確有常規俾守勿壞名曰清明祀會此可以見公之用心其所重者固有在也居家井井有條訓子弟辭辯語善行繁多不可枚舉大抵志廣而心逸才暇而神腴義高而見確非混流俗泛然微遂于世網者比故今奎聚五

星波恬四海人有鴻鴈中澤之喜而無松楸不識之恨昌家造與國運同休君子可以想其命脉之有自來而非偶夫公卒洪武壬申距生至正癸未享年五十娶孺人宋氏妙機後公六年而卒四子善慶善原善祖善護善慶明經有學為時知名昆季以月日之吉奉公偕孺人葬何小塢欲乞銘名筆以圖不朽因以其狀屬予予寔嘉之義不可以虛辱故備述之使立言者有所本云
洪武二十五年歲次壬申使春念七日姻生程福善謹狀

嚮明齋黃公維天行狀

公姓黃諱維天宇景高其先世出晉新安郡守元集公之後十五世元和遷祁門左田孫思敏唐長慶間遷休寧古林十五世孫允清號秀巖宋咸淳庚午貢士生方為公高祖曾祖諱啓字君啟真師山鄭待制風林朱學士東山趙徵君相友善祖諱樞字子運以明經教授不樂仕進

國朝定鼎之初有司累舉為教官終以疾辭既沒門人賓州判官金彥瑾狀其行請四明吳士英銘其墓有後圃存集考諱安民字則惠以明體適用之學歸然為眾所推尊郡邑稱其老成娶程民生二子公其季也為人寬簡至端謹

慈詳無邊幅之脩無機噉之設不以富貴易其心不以窮約動其志確乎不拔浩然自守而明敏過人克養有道故其內外昭融表裏澄徹而精純之氣見面益背君子小人無不敬而愛之居家無事優游燕適圖書衣冠整齊嚴肅竟日危坐畧無惰容雖遇倉卒警急不動聲色耽耽經籍子史怡然自得至忘寢食若古今名物制度世代治亂廢興四旁風俗之美惡天下山川之形勢農工商賈陰陽佛老之藝之說瞭然洞徹人有疑問無不即答須首尾貫通本末詳盡鄉人以文詞自多術玉求售者亦不直拒但少許可為詩文不苟嚴而有法書法一掃陋習精黃庭樂毅率更蘭亭草隸古文皆得其妙時或游戲筆楮寫為梅蘭竹菊之圖人皆爭取以為奇玩歲佃之所開窻面南翰林黃公養正為書嚮明齋三字鄉先儒程公著虛序而銘之生洪武甲戌五月二十六日沒天順癸未七月十九日丑時配金氏德性柔淑早世一女宦適璜源吳蕃繼配俞氏性資聰慧治家嚴肅先一年歿于男二人生蕭且冥女一人茲適里人金壽寧孫男二人光岳燿政成化乙酉正月初一日子時生甫奉俞氏柩合窆大園之源乃不遠千里走書京師而謂進曰甫親生既不能致三釜以養志親沒又

不能請大手筆樹壠頭碑名不孝之罪大矣願錄行實當執以俯伏名儒貴宦之門徽銘為九京之榮庶表孝思萬一耳進娶吳氏實公准女也忝居甥婿然學問荒疏不足以備紀述欲辭弗獲因摺次如右云

處士黃公仕信行狀

府君諱否仕信其字也出新安太守積公之後初閭尉之十九世孫高祖秋高公曾祖乙正公祖昌公俱仁厚長者父堯二公孝親睦族兩克稅長有古人風母俞孺人內助賢明生子二人而府君居次幼值慈闈蚤世敦孝讓以事父兄隆師友以博探經史練達世故長遭門戶徭役備經艱苦克稅長出納料量之平入京師以勞受賞中年戍調關陝謂軍伍國家大事即躬往撫慰應伍之人既歸千夫長為文以贈悅而闢田壞築室廬置庄于琨干溪口以及本里更忿兄之義姪丑童以異姓亂宗相與搆訟者十年丑童以子游郡庠府君亦以第五子入郡庠訟方得息撫庶弟晏成悟成有若同胞終身無疾言邊色景泰間敬宗收族已修世譜平生惟求聖賢大道而不惑於異端能循古禮而不兢於

時好能質管幹固而无侈靡浮薄之為是以所積愈厚所發愈宏而業日益以新以成化乙未七月一日疾終于正寢距生洪武己卯十二月二十二日享年七十有七配本里俞氏生女一適吳田嶺程孟嘉矢志孀節繼娶歛西楊氏淑慎賢明生子五長曰副姿主家政次曰廣委掌戶役三曰齊委之經商四曰悅委以課耕五曰霽委之教業樂群博習親師嘗謂之曰承家而孝輔國而忠富志乎此勿怠女二人長適本里金希振次適本里金梅孫男一十四人曰初曰亨曰庸曰思曰文曰武曰道曰達曰相曰旭曰楚曰仁曰禮曰樂孫女一十一人曰史適首村朱宗曰奇適臨溪陳祖隆曰盛適吳田嶺程振浚曰圓適字潭許容曰茂適清漪姚應隆曰珙適本里朱儼曰相適星洲朱允恭曰貴適鑑潭吳朝曰富適星洲刺史孫葉邦曰壽適琨干程壯曰京適郡城畢淵以今奉府君振美于里之慈頭塢黃龍出洞形坐其西乾于在郡庠時與其子霽麗澤相資今霽已入南監行將莖仕乃匍匐泣血以狀為請予惟朝廷治化之隆篤產人財之盛故仕于國足以輔綴皇猷而隱處于家亦是謀謨垂範若府君者雖歷艱難險阻猶能植業創家承先祿後雖其賦命于天者

有造化之隆亦由其立志之大而所成之益大也聊為次其平生之大致俾其子孫永遠之以為法云

弘治丁巳歲冬十月朔旦古欽宗人黃華謹撰

明故壽官榮三府君行狀

玄孫祖淵

公存諱長同一諱茂長字植夫號林泉逸叟行榮三為晉新安太守元集公三十七世孫先世家姚墩後為黃墩唐大曆戊午十四世元和公由黃墩遷祁之左田晉天福丁酉十九世并仲公由左田遷婺壯石門均宋太祖建隆庚申二十世立初公由婺壯遷橫槎

大明癸丑三十四世李文公又由橫槎遷福亭之重槎公為李文公孫辛奴公長子也八歲而孤箕裘舊業為樵者誤業因以墜稍長以戶匠赴役皇都嘗衣不蔽寒用不自給暨歸愛畜五符五符既蕃家道日昌遂恢復舊業而充拓之富甲于鄉一方之人待以舉火公不惟買田築室以增耀一時而且曰種陰德以遺子孫貧人稱貸欣然應之其不能償者則焚券以慰之復有求無難色嘗捐財造橫槎黃江壑口引坑等處石橋構嵩下涼亭三間買田亭畔以時修葺

其弘治間節克糧後為頑特不納者倍解徵銀玖拾勛壽至八十惟焚香祝天以願子孫之賢而事之巨細悉委任于元孫即淵之先人松軒府君也癸丑歲邑宰以公之德壽錫以冠服享年九十家政嚴肅見清修之士必隆禮以遇之待親戚以恩愛而凌節不悛者則嚴威不可犯奉先遠以孝思而立陵稍有頽毀必修築之祭掃稍有失時則怵惕不寧處善弱必俯就遇凶年必賑貸是以屬績在床而縣優以吊鄉之人沐公之德者若喪考妣生永樂甲午十一月二十九日辰時沒弘治癸亥十一月二十五日酉時孺人周氏有洪德生永樂壬寅八月二十九日辰時有八年以成化己亥二月初卒繼娶管氏雅稱公意納妾茅氏子三曰廷暄廷柰廷寧俱以勤儉發家女三長適甲道張子泰次適城西韓子舜三適菴溪潘子倪今兵部尚書裘毅公方塘其姪也孫男六鎮鈞鎬金錫錫孫女三長適疆溪臧子軒次適方村方子昂今按察副使亦愚公之孫也三適游汀張子鉅玄孫男十三浚河瀾湘清源淇沂滄湖洛洲洪玄孫女十曾孫男十八甲寅歲崇禎補縣庠六世孫男一女一先正德癸酉嗣等奉公柩村葬于本里鮑家段甲向殆嘉靖壬辰十一月初一辰時改杆于重槎住後坤向

與正堂傍葺同吉孺人先于春臺成化庚子十一月二十一日未時并葬本里
山東嶺獅形坤向管氏茅氏同墓住下知府碧溪王公嘗以唐風之勤儉幽風
之忠誠為曾翁頌且云翁之素履在懋德謀猷在遠大報稱在宗祖無愧在天
地宜膺乃福宜躋乃壽宜天降百祥以大昌乃後余不肖備教玄孫疎拙無似
未得為宗祖爭先以接德棣之盛退而與同志之士葺正宗譜以發前盛之傳
况公德在昭又容已于言以昭于永世耶乃敢為之銘曰

公在幼冲受斯教頑長勤王事服役于官身無完衣衝冒壯寒王事既餘
慎履言歸重闕我基重構我廬後之安居者公德之庇後之樂業者公澤
之遺食思公之未辰衣思公之在壯義思公之濟貧仁思公之拯溺思留
諸心用鑄于石昭盛德于不磨永孝思于無斁

慶士黃公顯政行狀

公諱顯政仁甫其字敬齋其號也世居左田乃新安太守積公之後縣尉元和
公念四世孫祖父並有潛德為鄉閭人至公自幼穎悟稍長好古勤儉性正大
執操不回非吾之所為者雖一毫而莫取若吾之所當與者雖重費而不吝怡

情林野灑、類無俗態遇清風明月輒有翛然自得之心嘗曰人生貴適志足
耳富貴何為好吟詩與季第日相酬酢時得佳句以此自老左田為縣尉肇基
之地子孫轉徙蕃衍自顯鄉公脩譜之後左田未有繼其筆者公一日念之惕
然曰是可任為己責乎於是用力編摩緒正而首序之亦具有底績可繼矣
生永樂二十二年六月初十日子時卒弘治十六年八月初八日辰時配孺人
凌氏子六人曰通曰達曰迪曰遜曰暹曰遠昔馬少遊每自誦乘下澤車騎款
段馬使鄉里稱善人可矣不必外求盈餘自苦古今相傳以為格言公也殆庶
幾近之矣內無齷齪於已外無怨惡於人而惟以吟詩為日課以脩譜為世業
其視時之溺志翰錄而喪其平生者相去何寥絕哉予頗知公者謹因其子之
請而為之述其狀以附家乘云

弘治十六年歲次癸亥秋九月四日姻生方齋汪謙拜狀

慶士黃君 大志行狀

君諱大志字孟立先世由祁閭左田遷休之西坑曾大父勝祖公隱德弗炫大
父聖奴公慷慨商于金陵以其貨貝進上上喜賜彩旌之父若九公年三十有

六而卒母邑南夏氏矢節撫孤而君尤蒙幼艱於保持比成童感慈闈鞠育之恩承顏順志不敢有違年弱冠即挈雄賞經營湖海所至下士親賢博求民情物理道踞遠近山川險易皆析洞於胸中然不規、於利誘惟周人之急濟人之貧與其交際者咸謂黃君信厚人也是以二十年間築室闢壤引流灌莽日與嘉賓觴詠以適其志或隣里生誕喪娶婚姻躬致其禮一遇水旱災傷互相救助其有忿結鬪爭必善以譬喻而解今之平生與三兄同氣怡愉有如花萼相輝其於弟姪劬曲有恩意下至婢僕之微御之惟恐有傷君以弘治己卯某月某日疾終於正寢距生洪熙乙巳享年七十有一娶西門汪氏淑慎賢明生子文護幹蠱克家以今某月吉日奉君柩塋于里之海螺山坐丑向未其孤護與予有一日之雅叩門求狀其實予以為尚者驚於貨賄而能知濟人利物而合乎義者不易得也君能孝以奉親和以處人惠以周貧睦族創家好賢尚德是蓋出人數等者矣即其平生序次而書之俾乞銘于作者傳於不朽云

登仕郎 鶴軒公行狀

公姓黃氏諱天相別號鶴軒休寧古林人高祖甫德申以孝友聞春坊汪蓉峯

先生傳其事曾祖甫庭芳大甫文森咸有隱德大宗伯王公華為殿撰時誌文森墓詳其世載考甫思馨以賞雄浙即大闕厥家鶴軒為人言簡行脩介然特立未嘗以富自侈而襟宇豁達清濁兼容視之渾渾莫窺其際州黨之任俠脂韋者試公之量各致其術相為周旋公皆見納雖圓鑿方枘終不見齟語之迹行蹤吳越間信洽于人賈無滯利僑湖之德清建德廩廣儲積觀時盈縮權其出入不為苛取巧持而歲入恒倍嘗語人曰四民之業雖殊義可通濟商之逸未能損利以濟人固義之所在也孝、奚為哉故視湖之人誼同一家貧窮患難隨宜賑卹而湖人視公亦若親屬然公性孝謹其事親也外不違于色內不違于心非特資養豐備而已矣同氣者三人而公任長齒且倍之秉家政三十年無錙銖私入時盈成之業以授二季不自以為功舊室與諸父同居以家指漸繁別築室于宅西已而舊室災即與諸父謀復之且曰斯址也吾生于斯長于斯與諸父聯情于斯者可忽然耶既又合諸弟謀曰故居雖足蔽風雨而燕翼之道未宏則又別新堂構輪奐奕然可庇數世嘗為區賦長綽有能績紱官員者如卹湖逋鄉人德之每謂公生明偏生暗此前烈之格言日祇奉之以

為修齊矩式故所見達于高明不移于詭隨不怵于聲勢不墮于利不澆于習
都憲汪從仁先生稱其為振世之傑折節友之老而彌敬吁可謂令德之君子
矣今

上嗣位之四年部劄以公輸粟賑饑授登仕郎以正德丁丑十二月十五日終
于正寢距生成化戊子九月三十日享年五十配鴈塘吳道翁季女婉順貞肅
甚得婦道側室德清吳氏亦賢副也子一曰琴淳謹有父風娶鑑潭吳氏以今
戊寅十月十九日奉公柩厝里之後園泣涕具實告予曰先人素履若是天靳
其年敢斷選述以圖不朽予惟曩公

榮膺例典之文藉稿于予茲用括其大槩繫其生歿俾信而有徵足備採擇以
俟立銘之君子云

肯

皇明正德戊寅歲陽月穀旦

賜進士第吏科給事中前翰林院侍

經筵講官古歙胡煜狀

雪亭居士黃公天佐行狀

方塘汪思

雪亭居士以疾告予馳往視之坐予於床力歆有言而喘甚弗能也乃以手作
狀予亦弗解既又曳予手捫其心若云知心人宜默契者予曰諸孤或不輯於
我飭乎幼子或懈學於我督乎外伺或投隙於我窒乎佳城或未吉於我質乎
居士作笑狀皆首肯之蓋居士近得一吉壤將營壽藏蚤夜冒風日以勞之疾
所由起也有頃遂終予哭之哀時嘉靖戊戌秋九月十有三日也諸孤從予拜
且哭曰吾丈幸最知先人請遂狀先人之行余攬涕曰諾歸將叙次其事每搦
筆輒大痛不能下一語明年洪水割吾鄉益且至余來奔郡城過雪亭之下諸
孤邀留信宿賊聲方大張居士柩猶在繾帳諸孤俱無以為計予謀窺之近地
之園又明年大祥將祭予乃克撮其梗槩俟葬日求銘於當世名筆云居士
諱佐字宗佑姓黃氏行隆七三世為休寧古林人蓋黃帝之後也漢時曰香以
孝著名晉時曰元集新安太守始家新安十五世初門尉元和家初門左田傳
三世曰敏始家今居高祖德申府君亦以孝友聞見予宗老春坊公所著傳曾
祖庭芳府君豪邁不羈號天隨子祖應森府君父桂陽府君字思馨大植有

家

窮好賢三子長曰相輔府君以興父子聲稱赫々于浙東西逮今人猶談之不
幸相繼以歿居士其仲子也方踰冠纘父兄之緒不墜益大強者不敢侮詐者
不敢欺蓋居士有才智而不刻沉默運用而措置適宜屹然一鄉之柱石矧一
家乎平居寡言笑門闈嚴肅雖弟姪已下皆惴々不敢越有所詬責人莫敢仰
視者皆率教唯謹凜々然信所謂嚴君也待賓客則和氣可掬燕樂必盡其情
復善厭人所好以故多樂從之者接士大夫尤厚以禮終始久而無愆儀焉好
觀儒書尤喜文公家禮凡律已治家動必求合冠諸子納諸婦必令一一習之
人率迂之獨行不顧也鄉俗忽祀事居士考諸禮諉祠作主歲時致嚴齋之日
見其所為齋祭之日如其上如其左右洋洋也余子偁為之壻嘗從見之
語予寔云然又率其族創宗祠揮數百金不吝蓋又以推其所為也予謂居士
寔慕古道冀欲變汚俗有所憑其設施不可量惜也其居之下也性素好潔清
結亭清漪之上去所居一里而近亭殊堅樸兩池以夾之面々受風月每日遊
樂其中一日冬雪作溪山體々松竹獻色乾坤清迥居士大樂之曰此吾自家
意思也因名亭曰雪亭而自號曰雪亭居士予嘗傳其詳云其壺觴歌詠款款致

諸士夫必於是士夫之好閑適無間識不識或郡縣官有興致能出俗者過必
下馬詢訪遂或留宿題詠滿卷冊居士今往矣亭前車馬猶繹々思歆起其人
而周旋以嬉也塋親於胡塘之原其居相望朝夕視其樹檟蓋非疾病不在雪
亭則在茲山矣又闢其旁隙地而廬之曰墓祭懋於是因儲書焉曰吾又於是
教子也疾旣亟戒諸子曰疾不可為矣五十不為夫無以傷為也因索家禮指
曰如此而歛如此而祭如此而葬其勿遠吾言慎無用浮屠以辱我時偁子亦
侍疾顧曰吾子亦識之旣又曰違兒可教吾子幸更留意嗟乎居士故執綺子
也乃盡削華靡一切以禮自克至死不渝縉紳家或媿之所謂富而好禮者非
耶居士母孺人金氏配孺人吳氏金吳皆五城大族並稱良內助李氏者越人
居士游武林時聞其賢而禮娶焉柔嘉貞淑居士甚重之吳旣卒遂以行內主
之事居士九子男五進娶油潭吳氏週娶商山吳氏遷娶臨溪程氏避娶鴈塘
吳氏遙國子生娶隆阜戴氏女四其次淑珍為予子婦他壻詹惟瑞吳孟康吳
文璘孫男十二曰格曰根曰彬曰集曰棠曰檣曰櫟曰梧曰會極曰檄曰
科居士生成化丙午十二月二十九日卒得年五十三君子以為善人君子之

不壽云謹狀

松峯處士黃公天贊行狀

萬安俞喬

嘉靖辛丑黃公松峯以其子選來議婚予聞選之類異公之有懿行也遂與納聘焉茲五載矣忽以公訃聞予驚痛之選奉其伯凡命衰麻杖泣詣予拜求狀以昭公行于不朽予情弗獲辭謹按公諱天贊字宗資行隆八十三世居休之古林其先黃帝陸終之後晉有元集公者為新安守遂家焉十五世傳元和公尉祁門家左田又三世傳敏公家古林十九傳德申公以孝友為鄉之聞人蓋公高祖也曾祖士亨公祖文森公父思馨公籌略過人豁達開創公其季子也幼聰敏多機智入鄉塾即曉書義應酬便捷思馨公鍾愛之年十七客游于湖之德清諳練老成人莫能干以私宥有素醉納羨妓以誘之者公以未娶苟合冥、墮行非所以謹人道之始也終不喪所守年十九思馨公歿哀毀踰節喪祭盡禮奉母孺人金氏色養十七年及歿擇地合葬于里之胡塘構室其側以愍墓祭事伯兄宗吉公仲兄宗佑公敬謹承順事無大小咸任其勞家居不妄笑語内外有別取其下無長幼貴賤並導以正人莫敢欺性質直清介不昵

取容不傲、自暴非其道一介不取諸人有勞於人而人酬之必靡之曰吾豈望報者耶居鄉恂、如不出諸口至臨義則可否是非毫髮不屈生平舉動光明心事易見凡所行未嘗不可告人苟有不足于中則亦無所諱也厭世繁文每事儉約而自奉尤甚涼薄至于宗祠之建立先後捐數百金畧無顧惜敦睦族之意藹如也德清俗侈而寘歲每徵輸輒告乏先是思馨公屢出金貸之歲久民奸多負其償公憐其貧者數十百家悉焚其券故至今頌公之德不忘公猶懼墜厥先業乃叔餘貲助古八成遺意以實貸相質薄其子息以立經久之規蚤夜勤勞弗遺餘力由是起貲累巨萬家日益大業益廣蓋視厥兄之功為多至均其所入則退讓不較其與世之計利害義者不侔矣年五十居老于家雅意林壑以自娛一日登眺石牛山見其蒼松森鬱翠盤旋欣然曰是山也西望之為胡塘考墓在焉東望之為瑤瀛祖墓在焉人無為樂近親為樂遂自號松峯而築生堂于是山之麓蓋始終不忘乎近親也復構松峯草堂于麓之右延師以戒諸子每自較其才藝課其勤惰雖歷寒暑一日弗怠時諸子有若選適者雖年尚幼皆強記善屬文行將見用于世要公之善訓所致也嘗輸

金地部以濟江淮之餓恩授七品散官乙巳七月寢疾時里有椿其大連抱一日迅雷烈風摧而仆之士人竊疑其咎徵在公果以八月十七日疾劇諸子跪請後事顧命遂等以善事家業命選適以專心向學織悉備至井、不亂已而曰萬事自有天理非人謀所能及遂閉口不復言俄而逝距生弘治己酉正月初三日享年五十有七元娶孺人霞阜胡氏蚤卒葬里朱家園繼娶孺人程氏孫溪筠軒公女柔嘉恭順仁慈勤儉公之賢內助也因艱于嗣以禮娶王氏于浙先公九年卒公痛悼之扶其柩以歸厝于居之後園子男八曰遂曰遜曰迎曰遺曰逞曰選曰适曰遊遺适遊孺人程氏出遂迎逞選王氏出遜毛氏出遂娶鴈塘吳君旭女遜娶霞阜程君顯女迎娶洪方汪君聖女遺聘臨溪程君教與女逞聘回溪蘇君顯女選即予壻也适聘孫溪程君敏女遊聘商山吳君紹女女二璿許聘歙邑柯實珪適臨溪程廷寵孫男二繁榮女二室鍾室瓶是年十二月七日諸子奉公柩厝于石牛山塋謹述其行以俟銘者采焉

槎溪黃處士松軒行狀

附墓銘

嘉靖癸卯秋余方廟木功成三上疏乞罷政歸老上不許嗣歲春復上疏辭益

堅乃許之親朋走賀槎溪處士松軒翁二子曰浚與瀾在會中深悼其先人德豐而壽畝以狀來乞銘于予余閱之惕然有感其丹心仁恕高簡廓落有未易以言語形容者姑舉其行之類于古人者以表有道按處士諱鎮字靜之號松軒行光二余少讀山房故友也出西晉新安郡守元集諱積之後高祖季文由橫槎遷福亭大父植夫父仲曙俱富厚長者處士生而不凡愛讀書毅然有匡弼天下之志植夫甚愛之然不欲使一日離側故卒不以爵祿萌于心而一遵其教以古道自砥礪起居無時惟適所安飛觴醉月佳作推懷詣親坐則環墓而泣暴者犯而性真自若與愿白裒沈諸君子之峻節美行者同一流也而睦族念貧暮夜畏知尤無愧于范楊之章志貞教以垂訓後人者是以生成化戊子二月二十二歷六十有一年以嘉靖戊子正月十八卒顧今垂二十年縉紳想其儀細民懷其德尚能使人興起雖死猶生也其為人豈易易者哉前娶龍槎金氏生成化己丑十一月二十三歷三十有六年以弘治甲子七月七日卒生子浚繼娶許村滕氏生成化己丑十月初一歷五十有六年以嘉靖甲申二月十六卒生子瀾俱克相其家後十有一年甲午十一月十六合塋于里之鮑

家段月形辛向其子若孫皆能事詩書習禮讓後必當有昌者因乃次其狀而繫之以銘、曰

古有吉士景行揣、翁德備隆翕然同風格天事業未行其志坦、周道翁敬其止潛德幽光山高水長詩書之澤浸明浸昌荒丘埋玉卓乎前脩述乃攸行以昭乃后

嘉靖甲辰歲仲春月吉

賜進士第資政大夫兵部尚書致仕蕪都察院右副都史奉

勅提督兩廣軍務養生菴溪方塘潘鑑書

處士黃公崇德行狀

方陶山

公諱崇德字用仁號金竺山人姓黃氏系出東晉新安太守積公之後歷傳至唐元和公者為閭門尉家左田自左田徙家歛竦塘者百二公為公之十一世祖也世為竦塘里人父文裳公為郡學諸生懷抱利器以宋元魁黃裳自期人以為然母汪氏公機神爽悟風儀秀整言笑不苟事當利害如孟德臨陣氣定神閑初有志舉業文裳公謂之曰象山之學以治生為先公喻父意乃挾貲商

于齊東齊帶山海沃壤千里入多文綵布帛公商其間法刀氏之任人師周人之織儉效任氏之貴善用國氏之富術一歲中其息什一之已而什倍之為大賈矣於是修猗頓業治鹽淮海治生之策益如齊東乃貲累鉅萬矣然絲麻穀粟豆之商無法得以直行徑情惟醜國家仰給有法或沿或革自漢論鹽鐵以來至於唐宋食貨志鹽法之議紛紜不一莫能究其指歸公博覽多通上自春秋管子之書東漢鹽鐵之論唐宋食貨之志明與大明會典講求周悉乃監司下詢則條陳利害言論侃侃監司輒可其議下其法於淮之南北夫淮海諸賈多三晉閩中人好啞奇畫策見公言論皆削稿斂衽從公推公為綱公居商惟任人起時正道自牧居商無商商之心不效貪商窺窬分毫然資日饒而富甲里中於是連棟廣廈膏田滿野廢居積貯充於維揚公不以富故而使族人不得其門而入乃津津行德施於州閭澤及鄉黨晏子曰自嬰之貴也而父之族母之族妻之族待臣舉火者半如公非耶公復好賢禮士遇賢士則揮金不靳有李白散金揚州之風至於孝友其天性然也與弟崇敬公極相友愛人比之元方李方若公者非但蕪賈其實商名儒行哉固宜子孫振振多賢以顯榮公

也公生成化己丑八月十三日子時卒於嘉靖丁酉十二月初三日子時享年六十有九卒之日三族皆盡哀配汪氏淑嫻賢明相公起家子二人曰佑曰佐
寫停鶴時佑娶吳氏佐娶汪氏繼娶張氏女一人適吳氏孫四人天錫娶吳氏
天鎮國子生娶胡氏天銳光祿署丞娶吳氏天鑑王府禮官娶汪氏曾孫君用
國子生娶方氏君聘娶畢氏君榮皆錫子鳴雷娶方氏鳴韶娶方氏鳴輝聘吳
氏鳴岐聘汪氏鳴和鳴珊鳴臯皆銳子而君立君輔君顯君耀君綬尚幼皆鑑
子諸孫並翠竹蒼梧夫以公之好德行義而後昆通籍金門鳴珮王室曳裾
大學蘭蕙庭階何莫非公德之貽慶之餘也哉先是公之卒也已有狀矣然綴
事無倫莫據公蘊至是公孫王官天鑑君曾孫國子生君用君厲信為狀將乞
銘于鴻筆兼補于家乘云

處士黃公崇敬行狀

唐新菴

公諱崇敬字用禮別號竹窓姓黃氏先世德望詳于家乘曾大父仕衡公大父
叔智公皆潛德弗耀父廷徽公為郡諸生聲稱籍籍少有盛才文章宏富娶汪
氏生子二竹窓公其仲也公生冲襟玉粹岐嶷不群雖在孩提孝友天性廷徽
公悅之嘗夜燭讀古人書顧見汪孺人抱公立嘆曰昔歐陽觀夜讀時妻抱永
叔立旁觀自以身多行德知永叔必達吾自束髮從學砥行累善雖歷試弗偶
不少怨尤夫力行弗怠者天將終相之此鬼不貴固當富吾家也稍長就學家
塾循循雅飭誦讀聲氣琅琅漸會屬文瞻巖特咸以遠大期公無何廷徽公不
祿哀毀踰禮已而家政叢委孺人泣曰父教兒讀書為實耶名耶吾今望於兒
其祿耶抑善耶兒固當畢而志如歐陽永叔第吾瘁矣公聞言泣失聲曰昔謂
之義今乃高耳即抑志從商業初遊齊魯燕趙之間既而止淮揚效猗頊氏治
壑能擇人任時取與有義不效世俗沾沾然競錐刀微末利義入而儉出賞大
饒裕公曰積而能散禮經明訓于是時時灑沫潤稿輸粟繼贖自里閭至客邸
蓋多霑被云晏子曰三族待以舉火如竹窓公者非耶屬歲大饑人且相食有
携子鬻者公詢知其無他出也謂曰汝鬻是誰後汝鬻者泣曰姑活旦夕耳公
昇之直而還其子其人謝曰聞昔江夏馮商還妾越州黃汝楫金帛贖士女命
子孫並登科第今君與汝楫姓同而行誼如楫我無以報君願君子孫如商如
楫子孫焉嘗經箬嶺有牽牛過者牛作骸骸狀蒲伏公前訊之則將入屠肆也

公爾然出厚值易以歸旅人噴噴曰隋侯療蛇毛寶救雀宋郊渡蟻之後僅見
有此君爾又鄰民有甲者遭乙橫誣將成大獄若對吏議則甲乙並償然公素
行乎於鄉閭力為解紛甲乙心服而全其家甲貧窶甚有山名水竹塢塋瘞其
先焉雷所發火貨不售數踵公門求售於公公憐而售之初公售時但如柳子
厚售唐氏棄地意耳不意以為吉阡得地後堪輿家謂雖陶侃牛眠裴俠桑東
不是過公乃奉母以塋始知神物自有鬼神呵護留遺善人豈偶然哉公見義
必為多類此尤篤友愛歲當里役與兄崇德公共之公曰是可以煩吾兄乃身
有之義聲翕然振鄉閭評評義者必曰竹窓公公襟懷冲澹遠避名勢佩
服老子深藏若虛盛德若愚之訓乃銜迹銷聲高尚寡欲生平不喜媵阿軟媚
事當利害抗體侃侃而周窮恤匱慕義如渴至老不倦真可為齊民法若公者
古之人歎古之人也今年五月九日遽疾卒維揚卒之日賈者罷市空擁哭公
皆曰義士云亡乎吾人疇依距生成化辛卯十一月八日亥時享年五十有四
年不怠德為世所悼配溪南吳氏閨壺稱賢子二長岩澤蚤卒次岩濡娶溪南
吳氏女一潛川汪田瓚其婿也孫極始生餘繩絕未交濡質敏好學從遊余僚
友呂涇野子門涇野嘉其篤信遵公治命從商然心有未安質于涇野子涇野
子曰三輔黃圖言辟雍諸生集槐貿易膠鬲太公嘗事魚鹽子果心存仁義而
身服商賈何妨於學即圓冠方屨褒衣綏步而有利心何名為儒濡於是乃修
膠鬲之業商名儒行以繼公志濡奉公柩歸新安權厝大庄之陽前期哀號請
狀于余余與公父子友善其忍狀之辭謹書其章章者受濡乞銘於當世鴻筆
焉

慶士黃公起宗行狀

方信

慶士諱起宗字用升姓黃氏別號後山其先世有名百二公者當宋南渡自祁
門左田徙家歙竦塘世為竦塘望族詳余所編宗譜大父都孫公父顯壽公潛
德不耀母吳氏慶士容貌龐碩豐頤廣額資性倜儻高亮直方孝友執義依於
名節恒慕先世文強之孝守貞之義事親務順其心人有貧乏樂於施予故鄉
人稱孝義者必曰後山後山云慶士治醴淮海太史公曰淮海東楚之地通魚
鹽之貨其民多賈性清刻矜已諾慶士商游其間於清刻者懷之以厚於矜諾
者御之以誠諸賈人化之海州守王公子謹賢守也嚴毅方正難於苟合門無

雜賓舍無食客重農抑商又其天性然也諸賈人有謁之者每為其摧抑處士
一日以商事謁守引經援史言論侃侃守大悅下階携其手賓于郡齋謂處士
曰謂賈人皆怨太守抑商豈知諸賈人自取太守抑也太守見諸賈人好氣仕
俠務巧事末熙熙壤壤皆為利來皆為利往飾冠劍連車騎為富貴容以相夸
詡太守故抑之不圖賈人中有黃君范蠡田甲即君真商名儒行也於是折節
屈已而與處士交致致盃酒接殷勤之歡考德問政於處士由是後山之名播
海州海州之人皆願交後山馬傳曰子貢鬻財曹衛之間所至國君無不分庭
抗禮如處士者非耶處士端厚簡默遇非其人禁不出一語夸毗之徒聞處士
之風自慙引避然善於治生能擇人任時得古良賈白圭之謀數至萬金居室
賞產雄于淮歛生平好義隨地感觸見淮漣諸賈人儻舍為艱慨然營室宇以
棲之或有嘲之曰人生世間如寄也去家商於淮漣如寄中之寄也商淮漣而
築室又如寄寄中之寄也蓋嘲處士不宜構室於旅云處士感額曰君獨不聞
檀弓乎賓客至無所館夫子曰生於我乎館死於我乎殯然則孔子非歟因誦
唐詩安得廣厦千萬間之句以嘲或人或人愧服故在淮漣賈人無館無殯者

多賴處士以濟若處士者即其作室淮漣一事觀之非孔子之德歟處士號後
山山通靈宣氣有仁道焉先事後得先難後獲無非仁也處士嘆世之織人見
得見獲則爭先之於事投難則引後故其以後山自牧是欲以得與獲為後而
以事以難為先其有智者利仁之心矣淵懷迤邐豈常情可推測哉處士生於
成化丙午三月二十日寅時卒於嘉靖戊戌七月十二日辰時享年五十有三
同唐元禎之年配溪南吳氏閨壺稱賢乎三人松檜柱並克家子檜先卒孫八
人文全文仁文化文仕文會為松子文傑文儼為柱子並稱其家兒女一適靈
山方遷遷余族子也孫女七溪南吳光翊呈坎羅夢林胡克胡仕信臨河江舉
人長子其臨河程紹武其孫壻也處士之墓在里之下塚處士姪孫澤宇君常
頌處士好行其德猶范蠡謂處士長子松公亦猶范蠡長子之賢惓惓敬宗睦
族編宗譜營宗祠其賢可知矣太史公曰陶朱公老而聽子孫修業而生息之
遂致巨萬如處士之子孫非歟故金謹狀其大較俾其乞銘表於當世鴻筆云

處士黃公竹山行狀

張石川

黃氏系出江夏漢太尉祁鄉侯瓊後有曰積者仕晉新安太守留家之官至

元和者為閭門尉居左田元和歷傳至百三公者居歛西竦塘百三公傳八世
曰宗錫宗錫生子孟孫孟孫生子玄賜玄賜仲子貴芳翁字仲顯始別稱竹山
母潛川汪氏翁少有異質凝然端坐動若成人無童穉游習之態長老見者莫
不器之長無子弟過業制科學策勵進取以家擅賢遠遂稍置鉛槧懷賞遊燕
趙吳之閒日益克羨雄長傳彙雖身安即次而不忘其親時致其壽歲時定省
承顏怡愉由由左右弗能去親歿盡哀葬尤殫其誠况明芳終且無後厚為殮
葬撫其二女同於己子遇季良方亦然性動制事絕以儉約未嘗狗嗜慾少自
適然樂周人急推予無所恡凡里閭交游有匱難者視翁若歸翁亦未嘗以為
德也正德中應 詔輸賑邊粟二千石例得爵賞謝不拜 命其行義若此信
乎賢矣矧狀貌魁梧語笑不有望之稜角肅然若不可犯聞人是非面折不少
恕及改則夷然無少芥蒂尤喜結納縉紳輔益宏博聲稱隱隱動于士林晚歲
簡出未老而傳卜築金竹之陽闢墅結廬時花醴秫招延嘉賓歌笑永日襟懷
泊然不問世事方爾佚豫乃以微疾告終事在嘉靖甲辰三月二十三日生於
成化壬辰十月二十四日年七十有三若翁者可謂生順死安者矣配汪氏倫

塘右族裔出越國公後相翁起家柔嘉貞淑為里中女媪所師法生男一善慶
女二婿鄭村鄭岩辰溪南吳鏗汪卒繼劉氏清源巨室女無出善慶娶溪南吳
氏生子冕國子生次吳吳卒繼巖鎮汪氏生子冕是女節遠潛川汪應春煥適
莘墟吳學易室清源郭氏生子昂最皋螽斯綿延將來蓋未艾云惟翁存日常
寓清源余從室牒往反 京轍時道翁所歡洽甚得以是知翁為詳今既已矣
九原莫作邇日善慶卜葬翁宅南鄭賢塘之原謂余稔翁以狀見屬直麻踵門
泣拜申請因潛然拭涕勉以翁之履歷如右且俟當代太史氏采而銘之庶幾
潛德有衍而不斯泯也謹狀

處士黃公象行狀

方陶山

處士諱象字用儀歛竦塘里人也其先多名德載于家乘至徵仕郎值公者為
處士大父父臣義公母汪氏處士生而雋邁聰敏絕倫孝行純篤早喪母繼母
不慈教善之處士愈恭謹先意承志竭力奉養備嘗艱難嘗言親之於子猶天
之於物雨露霜雪無非仁愛則母之於子或喜或怒亦雨露霜雪意也叵生慈
尤乎評者以處士有晉王祥事繼母之風處士友愛三弟式相以好貨財不私

二弟早亡撫弟遺孤恩同已子嘗言兄弟之子猶子也詎忍視之二心乎每嘆第五倫視兄子病退而安寢非有道之言不可為訓評者以處士有宋王宗元撫孤姪之風居鄉和易恭謙絕無機詐固弗踴躍以京亦弗翕翕以熱無論知與不知皆歡然相親評者以處士有漢陳太丘平心率物之風商游淮海連水其人剽輕伎僕處士弗仰智巧一御以誠楚人化之至不忍欺評者以處士有漢韓休伯不二價之風處士博覽多通於星官曆翁之書風角鳥占之術罔不精究占驗若神耻以技藝名世閱歲不章評者以處士有祖守真先生提身之風故能止惡未形防患將來終身考祥鮮懼懣悔人以為處士深於易理得於易之時焉晚年端居自適優游竦塘之間其於式穀貽謀諄諄孝友忠信不遠乎躬行高蹈者以率人若處士者所謂行從而言之非耶距生成化甲午六月十八日巳時卒嘉靖壬辰四月十八日卯時享年五十有九同宋魏仁浦之年塋七畝配休寧潛阜汪氏賢明和惠生丈夫子一友益繼美前脩配巖鎮方氏孫三人毓秀以行藝著稱于人欽秀魁秀並為鳶停鵠峙憶當李唐之世大江之南孝友登唐書者僅得六人處士之宗黃芮者亦以善事繼母得旌其門

然無他奇行也今即處士善事繼母一端有軼黃芮黃芮處常處士遭變過芮多矣異時豈無觀風者采之登載 皇明孝友傳歟謹狀大槩以俟乞銘云

處士黃公豹行狀

方陶山

公諱豹字用韜姓黃氏歛竦塘里人也其先世詳余所編譜中父五雲公鄉稱善人母汪氏生公公生巖然稀言閑雅靜默豐順廣類宋丞相董視識者知不貴當富少遭家嗇見邑中富商大賈飭冠劍連車騎交守相楊揚然謂然卑下僕役其鄉人喟然嘆曰彼之黠黠者獨非人耶失好語仁義而長貧賤誠足羞也然聞千乘之室萬室之侯尚猶患貧而况編戶之人乎於是辭其父五雲翁挾貲以游荆襄荆襄南楚董董物之所有貿遷而數致困公欲更其業諸賈人耐留之公曰嗟乎昔蜀卓氏處段前段前地狹薄不足以致富更業汶山之下富擬人君若父居荆襄是長貧耳於是輦其資斧之淮南淮南東楚都會之地魚鹽之饒公絕機詐壹為蕪賈父之一年給二年足三年大穰為大賈矣公既為大賈富好行德喜施予大抵又公天性然也不類諸賈人一錢靳不予人公見海濱坐丁有饑寒者無室以蔽風雨者失時不婚嫁者惟患難而逋官

課者周之惟恐後海濱之人感戴之不啻父母故有鬪爭不之官府走質公之
邸得公一言惟然心服及公還維揚相率追送恋恋不忍別號于途曰黃翁去
我乎吾將安歸太史公曰齊冠帶衣履天下海岱之人歛衽而朝焉今海濱坐
丁歛衽德公如海岱之人歛衽朝齊非耶公之義聲翕然稱東楚公嘗讀貨殖
傳至魯人曹邴氏賞至巨萬使人去文學而趨利未嘗不廢書而嗤之謂賞巨
萬宜尚文學是禮之生於有乃曹邴氏人顧廢於有陋矣豈周公之遺風乎於
是遣其孫漆業儒從諸薦紳先生游補郡學博士弟子漆能繼公志才藻華麗
爽邁不群清朝之器圭璋之質也公之處鄉閭周窮恤匱壹如維揚若公者誠
富而好行其德豈纖畜之徒測其堂與哉公生於成化丙午十月初八日酉時
卒於嘉靖乙巳八月初六日寅時享年六十卒之日里不歌春不相海濱之人
聞訃哭而祀之於家而曰吾之得保斯坐賴公以舉火也可以占公好德矣配
孫氏有賢行子男二曰錡曰鍊孫三人曰漆郡學生曰渭曰瀾信於雙泉君漆
有文字之雅夙仰高誼未得侍杖屨為憾公墓在里之七畝灣前時已有狀狀
未悉公之蘊至是汝澄君更屬信撰之將乞銘於立言君子以銘諸墓焉

北巖處士諱琴行狀

桐灣程恭

北巖黃公世居休陽古林出晉新安太守元集之後唐初門縣尉儀孫思敏由
左田始遷今居寔公二十四世祖也高祖庭芳曾祖文森祖思馨考天相號鶴
軒自鶴軒而上世以質樸于鄉然嘗循守分業間斥贏餘以調貧乏世以此取
重于人汪春坊王宗伯汪太史潘中丞諸公先後錄其事公諱琴字舜音生有
殊資少凝重如成人稍長知學子史之書過目成誦鶴軒逝年弗永無他子公
竟循其業商鹺于浙卽息益滋嘉靖甲申祖母金孺人歿公以嫡孫承重喪祭
惟準家禮未嘗徇俗侈費尋協諸父營創宗祠規制宏備君子曰舜音可謂識
其大者自思馨公擅鹺利聲迹徧江浙修而守之迨公三世公獨以司府承應
為勞以商舶水風為虞以過誤刑罪為耻迺更其業于德清溪東闢地治宅為
連廩以儲秬秠阨窮者或從而卹之不責其入湖地饒物產而齊民無蓋歲公
私徵應率惟典質匱乏者咸得而調之未嘗剝切于出入間而愆期者亦需以
待潮人無遠邇咸嘖嘖稱嘆大司空石菴蔣公湖之望也養重于家寡見接慎許
可遇公持厚每見輒相與盤桓竟日其語人曰黃子舜音商隱者也往來贈述

倦倦湖中士夫際為延譽公念鶴軒之喪拘于時而未窆也營墓辰山之陽營塚崇階豐祠邃室歲時致哀明年吳孺人壽七袞繁飭禮儀遍延宗戚惟飲爾旬曰吾夙志立名顯親以蚤孤就賈竟爽心期祇以是娛飭存歿聞者矜之吳孺人以桑榆榮盛怡顏就養忽一日召公誠曰吾夜有夢頗戾于恒吾年七十其來幾何汝宜以德清場事簡畀于人朝夕左右毋履吾遠思吾死瞑目矣公奉教綜理場事擇託所宜事既而疾作醫弗可也乃嘆曰吾止是耶向者吾母夢吾徵之耶吾不能終養有遺憾矣遂卒于溪東別館嘉靖丁酉四月望日也訃聞之明日仲父雪亭趨德清以公之喪暨其側室子歸湖之人哭奠者途次相屬惟公富而尚賢撝謙執禮遠絕驕吝與諸父年齒相若而卑牧循分動無過舉每感世系衣冠篤誨其子俾弘先志舍北有山巖然壁立乃寓號北巖以自號公生弘治庚戌閏九月十二日享年四十有八配孺人鑑潭吳氏側室仁和洪氏子二榜聘臨溪程輔與公女楹尚幼未聘女一寶銀許聘陽湖孫春時卜今年七月念五日奉公柩厝于上村某為通家詳其世德于公充景企焉謹狀其大致以俟擴揚潛德君子尚有考于斯云

慶士黃公羅峰行狀

胡熙軒

嗚呼吾忍忘於外祖黃翁也執翁生吾母三齡而翁逝以吾齒逆之蓋迄茲已四十餘稔矣維夙夜以弗克究翁之名與行為愧又明年乃始以聲律之文遊失紳佩之門以求詢翁之梗槩炳炳乎麟麟乎於是言矣翁諱良芳字仲賢羅峰其別號也其先積公仕晉為新安守源濬千祀日演以大玄賜翁者魁傑雄偉以鉅貲振家生三子翁其季也翁幼而穎異長益通達顏渥膚潤懷奇負氣年弱冠讀書通大義不解以儒自飭而行事多磊落無拘拘剪剪態識者謂黃氏有子矣翁嘗謂人曰翬黍臙臙所以非我也紱服雜選所以華我也夫豈不知所自出哉父老矣吾不忍以安自處而以勞與父遂慨然有囊橐江湖之志初遊姑蘇觀人物之盛舟楫之聚乃笑曰吾父可待矣即去華侈節嗜慾審低昂齊盈縮九萬金有疇皆躬自揔轄而出入之三年乃倍其初諸名公一見重之且曰吳中無與儔也由是士輩知所眷慕每一歸贈言盈貼族以為榮翁歸家不自怠逸溫靖之隙則以書史自娛嘗著素行錄以自勵嘖嘖人口於今未厭蓋雖迹涉闌闌而心遊高曠每遇佳山水輒與一二文人造焉其幽遐瑰詭

則目擊而神會之觀其意思欲一奮奇迹續厥緒而乃退以澹泊無私其贏餘以傲倪於世者於是而吳而荆湘而齊魯而南北大都足迹聲名殆半天下矣或曰翁商也奚有於是或曰翁商也而有不商者存嗟乎此蓋翁之大槩吾得之於紳珮先生也者若夫閨闈之譽几席之談固不待言矣初娶孺人潛川汪教授女有婦道生吾舅福慶甫二歲而汪逝後娶孺人胡源胡氏女和順燕婉未逾月翁有事遠方再歸而生吾母未幾復有事姑蘇遂病以歿時正德戊寅年九月廿四日也年方二十五士大夫之來吊者咸盡哭孺人胡氏守志自矢鞠吾舅不啻已出於翁之父母自養至殯率如禮不以翁存歿為損益壽止六十鄉之稱鄭孝者皆歸焉舅氏壯克自立生子獻章平章獻章為邑庠生嘉靖戊申十月十有八日移翁柩塋於上山之源松於我翁有樂誥於王曾之義不敢以荒鄙辭謹述翁之章章尤著者如右焉

處士黃公雲泉行狀

孫台石

君諱瑩字元潔姓黃氏別號雲泉歙竦塘里人黃氏譜牒稱出黃帝裔陸終封黃以國為氏自春秋迄漢晉名臣史不絕書曰積者東晉時守新都郡卒葬新

都之姚家墩子尋因廬而居新都遂有黃氏厥後伯漢為襄州刺史德誨仕唐為御史中丞事並在簡冊傳逮祁閻尉儀始遷祁之左田以世相傳為百二公遷竦塘而族稱大七世孫曰原祐公由胄監判霍州季子壽廣君尊大父也大父讓公父衍政公三世皆不仕衍政公娶程氏生君君生而沈重寡言不苟嘗笑自幼嬉戲不與群兒伍里中長老見而異之曰是兒必宄吾宗黃氏世貨黠兩淮甲於曹耦然與官為市法稱浩繁而盈縮靡定非善應多籌策無以近奇羸君稍長淵慮斧斷漸露芒角咸謂兩淮之間非得君不可乃始抑志輒學居止於廣陵淮陰時與同儕白事監司運曹君獨文雅謹密氣直而溫言約而達見者咸心知其非庸商也遇之加厚有所張弛者多以君言決以故同儕悉倚重之君治業務存大體謹出入明會計時低昂不屑屑競錐刀而賞鑿大殖其所規畫視計研七策猗氏邪羸往往暗合君雖以善治生起家而慕善恒若不及樂與薦紳先生文學交遊相見譚時務廢置所宜或扣名言雅論規益終日竟夕不倦或語及芬華浮豔輒正容直視終不發一言薦紳文學敬愛之多願與締交君貌雖和煦而是是非非未嘗曲徇爭競者聞其片言或觀其微哂

無不愧服其醇厚動人如此性好施與嘗遇年飢族之貧乏者多求貸曰願出息君憫然曰吾恨不能悉周也曷以息言哉故里閭中多蒙君惠者君孝友純篤早失所恃終身哀痛不忘事父以光前裕後為大孝義方訓其子惟以脩身克家為重不徒務咕嚕微虛名卒之日呼子若孫謂曰吾平生何以自立尔能識之吾目可瞑矣語不及亂君之高致大都如是娶鄭氏許氏又許氏生子男二人治娶鄭氏泮以翰學名列儀部娶吳氏女一人適郡城吳別駕公勲第三子孫男良貴良貢一聘汪氏一聘鄭氏孫女二君生弘治己未二月二十日亥時歿嘉靖庚戌九月十九日辰時距生享年治泮將以奉君柩厝於下塚之原匍匐泣血向某乞狀以圖銘烝之石某又知最稔誼不敢辭謹叙列其行事如右俾用告於作者以備採擇云

處士黃公南園偕配方孺人行狀

方陶山

龍虎叅軍值君曾孫臣義公之孫象公之子曰南園公者名友益字子謙容貌魁岸風格峻整邁宗澤之疾卒於正寢卒之踰月與其配方孺人者發引有於是其孫大宗伯門下諸生毓秀君儼然衰絰悲號屬狀於信信當南園公無

恙日與澤宇君濂拜南園公於家瞻其貌頽如聽其言諛如觀其度雍如退而嘆曰噫茲古葛天氏之遺民也澤宇君曰子特見南園翁之袖矣爾未見翁之心也信曰翁心何如澤宇君曰凡人孝衰於妻子友奪於讐猜翁事父母孝行純篤親喪哀踰禮遭從弟橫逆之加傲則裁之以義格則懷之以恩其孝友足稱也凡人敬行於鄉老少異焉翁齊老少壹於謙讓其敬足稱也凡人詞約意晦翁當衆言盈庭片言剖劃群疑以釋其言足稱也天資峭刻者遇哀而樂翁見可哀泫然涕零其慈足稱也賈人逐末者恒仰机詐翁則善因利道取與協宜其義足稱也至若貪夫殉財富而驕侈者人之恒情翁卷懷深歲知足不辱家累萬金敝衣糲食若貧士然其清素足稱也然塵視軒冕鄙子貢矜富以駕大車婆娑南園尋淵明白衣黃菊芳躅是翁之鴻飛九有蟬脫埃囂豈區區逸民可班歟信曰然信昔徒見翁之袖今乃見翁之心哉夫孝友恭讓慈祥簡素人有一德於是者亦足以列士君子之林矣而况南園兼有之乎則夫狀翁之行舍澤宇君之論將奚求耶翁生弘治戊午七月初七日申時卒嘉靖壬戌五月初六日巳時配孺人巖鎮方氏六德載循四典咸備為女為婦為母為

姑媿美先懿有光彤管生弘治丙辰三月二十二日丑時卒嘉靖壬戌五月初三日寅時子三毓秀欽秀魁秀皆卓邁不群欽秀魁秀痛先公卒毓秀配巖鎮汪氏欽秀配富塢汪氏魁秀配石橋吳氏孫男四人復禮復禧復祺毓秀子復初魁秀子咸稱家兒女一一適溪南吳尚威一許聘溪南吳應宜孫女二一適鮑潭府學生鮑可傳毓秀女一適潛川汪萬選欽秀女毓秀君卜是年某月日奉遷公與孺人之柩權厝某地信編譜於斯親觀公之德容稔矣則狀公者非為窳談也謹述公之章章者為狀俾後之銘公墓者有考焉

慶士黃公節齋行狀

孫台石

君諱錡字良和號節齋姓黃氏歛之竦塘人黃氏史家相傳以為陸終之裔即所封為氏東晉有諱積者為新都守卒塋新都子孫守墓而居族遂蕃大百二公兄弟以宋乾道遷竦塘世以素封著稱九傳為償公君之曾大父也償公生五雲公五雲公生豹公豹公娶孫氏生丈夫子二人君其長也君生而脩爽凝重言笑不苟幼讀書輒通大義五雲翁嘗曰亢吾宗者其此兒乎然以家世商隱折節居積業始遊吳會索賞雖駁駁向盛乃貨齋淮揚間 國家邊計倚齋

政而兩淮尤擅利權商與官為市當任者非桑孔必計魚根則齋齷齪碎朝令夕易顧及卑諸商諸商亦罕能伸眉吐氣與論論直填益君須商而博涉左傳史家言每借儕耦白齋司必推君對君侃侃然發中要領氣勁而詞溫所諮稟多見聽父嘗在淮以通齋利忤豪猾相競聞構訟院司君聞奔赴見齊侍御高司使臺司皆直君卒真豪猾法由是君聲籍籍為儔等所引重君退讓好施與咸出自天性鄉人有所侵侮置弗校居齋場視窶灶不自存者賙之時有所貸不責其償場之人至今德之不忘至於好賢禮士揮金不靳有柳開客大名之風君客淮陰日淮陰當南北四衝之地士夫轂擊之區君延納館聚接轄餽遺而尤注意計偕寒素者賴君踴躍窮途飛翼天衢儒紳翕然稱節齋居家孝友篤至得父母兄弟惟父客死維揚千里扶柩歸塋毀瘠骨立里巷悍婦嘗以死懼君母君曰若輩所利金帛耳即取散給築別室迎母養焉甚愛其弟賞財田園室廬君所創置悉均之無一私毫生平以剛直自許面折不能容人過嚴重無玩好惟喜讀書史對人談古今事疊疊不倦星曆家說亦能言其指歸自以遠志抑鬱於商謂其子濂曰丈夫有志四方立身揚名以顯父母孝之終也昔

范孟博登車攬轡即思澄清天下吾愛之重之願汝曹效之故以汝澄為汝字
汝其勉焉嘉靖癸丑三月六日子時寓淮陰疾革唯悲不及面母目且慎猶
力書几上曰據吾志生前多少事未了惜乎天留吾年爾語不及亂距生正德
辛未五月十三日子時年僅四十三娶長齡趙氏生子男二人長即濂為郡諸
生娶吳氏次瀾娶吳氏女一人適琵琶塘胡良材濂瀾以嘉靖癸丑冬扶君柩歸
厝於下塚原濂於余有同志之雅得聞君之素履甚悉謹為次其諱行如右俟
夫銘君墓者

處士茶山滯行狀

茅見滄

君諱滯字子沾姓黃氏別號茶山歙之疎堂里人黃氏出黃帝裔陸終受封于
黃春秋迄漢多名臣燁燁在史冊東晉時曰積公者守新安卒于官子尋奉葬
于姚家墩因廬居焉故新安之黃氏自積公始尋公五傳為伯漢公刺襄州伯
漢公四傳德涵公仕唐至御史中丞又七傳曰儀公為祁閭尉遂居祁之左田
十六世孫曰百二公遷居疎堂凡九傳為叔智公君曾大父也大父迦公名在
博士籍中有令譽生崇敬公稟至性一時翕然稱善人不嗜仕進治耕讀業已

而貨饜廣陵淮陰間慎雖為曹耦推重娶吳氏生君君生而廣額豐頤脩幹麗
姿倜儻有大志習舉子業文藻蔚然聞溼野呂先生以道泚人往從之游領真
知實踐與旨遭崇敬公早年不祿君方弱冠母謂曰家饒而孤奈何君泣拜曰
敢不勉力以無忝先人自樹在德母其勿憂乃折節嗣父業申約飭規遵能倚
實審盈縮低昂取什一之利黜一切狙謀詭習而業發發逾在父時君雖握計
然畫而務脩士行嘗輸粟補官慕林泉澹宦情竟不就顧樂親賢士大夫賢士
大夫咸樂與交遊家居暨旅寓接見無虛日禮於義餽不別顯晦知識徧海內
而樂善循理彌兢兢然足跡罕入城市于縉紳顯者未嘗有私事干一刺每遇
郡邑上計輒奉儀物致辭曰某良民無字在官以政和家給顧效溪谷之老來
送劉公耳上計公多感而稱賢屢出厚貲助賢士之不足者他如營祠奉先造
梁治第利人之舉悉樂為不厭屬倭寇嘯聚南土在在議築城守禦富民多規
避之君慨然曰民事也遺父母憂且崇歲吝散非智也顯裕諉惠非仁也遂首
築銀之玉屏門及城數雉又築維揚水關上官聞輒旌之君退然不有也君孝
友自天性父不及遐養母清節淑德勤儉為閨壺範君養志承顏惟母命是遵

舉足不敢忘錐遠遊時致其脆省問至老如一老終之日哀毀逾禮尤喜周貧
蘇困惠洽于族里賴而殖其家者且半族生平面折不能容人過至涉事引義
推厚一歸于恕下御僮僕恩威交至故悉畏且懷無敢侵牟者性嚴毅能斷善
解禁息爭以恬厚退讓飾等輩其言理直而氣溫不阿不棘聽者輒感服故殊
堂之俗鮮罹文法對吏議者數世君善承化導之力居多郡中達者以為有彥
方太丘之遺風云家政甚嚴肅義方訓諸子數為延致明師弗效時俗薄禮靳
費也嘗遍遊名山多捐貲有所建立卒之日勅勅以力學致身慎行保業戒子
若孫言不及亂其雅行懿矩莫可殫述娶吳氏生子極及榜庶子梯程共四人
極娶胡地官孫女榜娶吳上舍女俱受命業成均極績學工文詞銳志進取榜
補中書舍人女二人長適上舍汪大垣次適吳一中孫男四人立忠聘許中翰
女立孝聘汪上舍孫女立節聘吳上舍女立義尚幼孫女七人俱幼君生弘治
辛酉四月三十日丑時歿今年四月初一日未時距生享年五十有七君之子
極榜於余有舊雅余過廣陵時君晤余於舟中已而談笑茲洽者數日驩然如
平生余不可謂不知君乃叙列其行事如右惟立言君子採而銘諸幽焉

賜進士及第通議大夫太子賓客禮部左侍郎兼翰林院學士錢塘茅瓚撰

處士瀛山君行狀

君諱雲字公望號瀛山世居休寧黃村系出於吾左田自恭公始遷至君二十
二世祖高興父天護並有隱德君遺腹子也賴母吳氏節教鞠育底于成立既
長痛父蚤背砥礪作人事母篤孝左右不違其志明周易大義慷慨有氣節侗
儻不群善射每鄉間緩急有事必取辦於君曲直有爭必取質於君而君亦披
心膽以身任之不辭人倚重焉平生留心譜牒與牀繼芳輯本支正宗譜業有
成一日聞瑜有志於是遂持以來首請事焉談吐壹壹相勉無長語歲時暇則
相訪於洽無怠心瑜未始不幸同心之利斷金而亢宗有人也無何携貲出商
維揚之間舟次瓜步賊猖獗弗戒被戮同時遭毒者若干人得脫者不一二人
而君之猶子伊汝志亟奔其喪蹤跡號於官盡獲屍輩磔之以雪其憾汝志故
有學篤行士力能集此而瀛山一生視律之懷與人許可之氣雖劫運之偶值
而豈英風之遂磨於君子三曰伸曰儉曰俸茂有佳器卓立可望天其或者溥
於其躬而厚於其後之人可知也審如是瀛山為不死矣瑜因收族重有感焉

為一述之以遺其世謹狀

嘉靖三十八年歲次己未一陽月望日宗姪漆園瑜拜書

處士黃公見山行狀

鄭誠

公姓黃氏諱音德字彥忠見山其別號也始祖禹自祁門遷休高源世有偉人曾王父茂王父義父真祐俱有隱德公真祐公次子也幼有異質未弱冠了經史諸書大義尤長於法家郡守聞其賢召為府掾公素無意於筆刀筐篋雖不欲就然力辭不獲遂受辟焉時 皇明受命大新政治懲元季之寬縱頗以威刑肅下在位者皆慄慄危懼公益不欲仕迨偕計選部遂為肥遯計優游林下澹然若將終身焉公為吏廉而好施苟有利於斯民皆盡心而為之雖罪懼大辟者亦必研精殫思以求其可生之途鄙人感德之其居鄉也循循善誘賑貧恤孤殆有表正鄉閭之遺風焉遇事優焉從容不迫雖造次之頃而神閑氣定自若也治家井井有條輕財啗豕不計錙銖之利而崇益廣家益裕若有深得夫迎來之術者焉公之事親敬養咸備處兄弟友愛天至其定省之宜溫清之節敦睦之念皆可以為世法人以為孝悌之義惟公為能盡之晚年德譽彌彰

遠邇矜式咸謂 天朝玄纁之聘指日可至而公固已衰矣永樂甲辰十二月以疾卒於正寢距其生至正丁未享年五十有八配汪坑金氏蚤卒繼陳村陳氏子男五生童壽童俱金出九童象童愛童暨女釧俱陳出釧適潛富孫男二質生童子衍壽童子公之卒鄉人哭之者屬路諸孤方謀窳窳之事而請行狀于予予思公逢季世長躋明時 聖天子勵精圖治不次用人如金兼况鄭錢塘輩或以輿皂或以吏胥或以閭右皆居廡任歷清途澤及當時聲施後世其儒績竒逢有足矜者公之德望才畧誠無愧於金兼諸人宜其追跡蕭曹樹功千古而竟安於家食沉伏草莽而不得一試亦可慨矣然碩德重望入於人之耳而刻人之心者則雖死而不亡也故特次其行之顛末以俟觀風者採擇焉謹狀

明故處士黃公南崗行狀

斗山俞毅夫

處士姓黃氏諱崇德字彥廣南崗其號也始祖禹公者肇基土宇丕振家聲考槃弗諼高尚之士也曾祖茂公者樂成善事濟急調貧立大宗祠以敦昭穆博施之士也先考真祐公者愛幽雅尚篤實好善嫉惡不徇流俗被仇誣舉致歿

於成履險之士也處士遇父剝時年方三週當父歿時年僅七歲本衛重後勾
 擾家業廢殘而母又以早世伶仃苦勢無所倚及長德慧漸明知慮頗覺與妻
 嘆曰吾考德業如此家聲如此誣累如此吾為子者詎可餒其氣墮其志而顧
 其為人下乎詎可安於家之類敗忘於父之受誣而不復先人之恥乎於是勞
 心焦思竭力生殖不避艱險以及中年籍天道福善之庇獲否極泰來之休或
 商於外或殖於家莫不利有攸往產業擴充賦稅日增迨永樂間以齒德甲於
 鄉舉為耆老燭理惟明處事惟公邑侯器之及考終而遺囑子媳曰起家以勤
 儉為先守業以和睦為貴能守吾言歿吾寧也據處士之行而觀之功業殷盛
 能復先人之舊績嗣續多賢又可慰先人之素志稱之曰光前之孝子可也稱
 之曰裕後之賢祖可也如此之士豈易得耶生洪武甲寅七月二十日歿正統
 己未六月十二日壽六十五歲配孀人芳溪程氏諱好温厚柔順生洪武壬戌
 五月十四日歿宣德丁未二月十四日子五而皆賢能長曰才童娶汪平程氏
 次曰英童娶查氏曰負童娶朱氏曰鰲童娶龍氏曰羅童娶葉氏女四而皆微
 柔曰岩適澁川朱氏曰公適京村洪氏曰山適汪干程氏曰佛適巴庄朱氏男

處士 志鰲 公行狀

汪循

孫曰天賜穎異不九子姓將以是月之吉奉窆首村寺山之陽予與處士姻契
 也德業素履令聞廣譽聆之久矣故為次其行實于左俾後有所徵云謹狀

君諱敖童志鰲其字也為祁閭尉像公之後歷八世孫禹公遷今高涇高曾祖
 皆仁厚長者父彥廣公質而有文儉而不固母孀人芳溪程氏生子五人而府
 君其四也早年立志甫成童剛毅如老成人是以能嗣守先業益大新之凡有
 忿結鬪爭需公一言而決退無不服且樂善好施每成徒杠以濟病涉路有崩
 圯悉捐資鑿石而平坦之歲大歉則貸穀粟以賑尪羸死弗能葬者則給棺以
 葬象當為悉為之賢士大夫過訪相與投論終日投壺雅歌或應徭役於郡邑
 必完事於衆先甚為守尸器重親朋婚姻葬祭躬致禮無所失雖童僕愛撫不
 易呵責舊蘆失燬則剗高就低鼎創華堂重門修廡平生卓立幹固遐邇皆稱
 揚之以弘治丙辰二月廿三日疾終於正寢距生永樂甲辰享年七十有三配
 孀人龍氏賢淑而善理家服勤纂組應賓奉先各有攸當生永樂辛丑卒弘治
 戊午五月四日子男三人文顯娶陳村陳氏文瑞娶邑南葉氏文茂娶商山吳

氏孫男四人克仁克寬克勝克成以正德九年十一月廿六日奉柩合葬二十九都行者坎犬戎形坐卯向西子未第時與君之子瑞茂為莫逆交因未泣請狀公之行予惟公能嚴毅幹蠱固以創家賢子賢孫以昌大其後允為邑里之吉人且情實對而得吉并安敢不叙次平生之大致俾乞銘於墓而傳之不朽云

處士文憲公行狀

程敏政

處士諱衍字文憲行基十一為漢尚書令黃香公之後初閭尉元和公之裔孫也而始祖禹公當五季之時遷休高源曾大父真祐大父音德俱才猷卓犖傑出鄉閭父壽童公幹固有為早膺瘋疾處士躬調藥餌左右扶持衣不解帶及其沒也塋祭必竭其誠哀毀踰禮服闋又值慈闈繼喪每痛泣曰天乎既喪吾父又喪吾母孑然孑立吾將疇倚悲號不輟聞者無不動心甫弱冠家值軍民二役徵催旁午能幹旋運用處之裕如更下士親賢講論經理智識日明才猷日廣雖遍歷危險盤錯無有難為者矣初以祖居湫隘創新居丙申歲震嗣早喪鬱痛平生以孤身屢遭變故然以開豁練達經營創植貲產甲于一鄉有非人所能及者矣以成化十五年初二日疾終於正寢距生永樂壬寅八月十五日申時享年五十有七娶京村程氏慈淑賢明勤儉綜理處士與創大業賴其內助君君子男四人曰慶娶邑中汪氏曰昌娶京村程氏曰政娶八都許氏曰昇娶選川朱氏孫男初與庭興富興貴興巖隆若玉修德明德以正德二年六月十二日奉柩殯於里之下邊園其孤慶與子為莫逆交涕泣未請其實嘗謂柩初生於深林困於蓬蒿厄於牛羊及歷歲月之久則其高大可以干雲霄傲霜雪柱明堂棟清廟無乎其不可若處士甫弱冠遭嚴慈繼喪尸歿艱逼然卒能興創大業承先裕後得無有似之耶茲聊為次平生之大致俾垂緒有永為子孫法云

處士瀛峯公行狀

白野胡文孚

公姓黃氏諱天從字文順號瀛峰休之高源里人始祖禹公者自初左田遷居是鄉遂為邑之望族公幼聰慧敦禮象尚詩書有不允志年及壯遂任父勞負荷世業於是操贏資泛輕舟客於江湖襟懷洒落飄然有陶朱趣而不屑於伸縮之利厭時俗之拘陋嗜風月之雅興遇佳節則與賢士大夫登臨為樂盡日

而返人稱之曰此公能超於湖海者也公之創業勞其經營而生財有道量其出入而節財有方人稱之曰公能善居室者也公之戶役以賦甲一鄉挈已財以完官量貧富以寬假人稱之曰公能急官事者也公之居家則愛敬形於菽水之奉參順協於堦麓之和人稱之曰公能盡孝敬者也居於鄉黨則老者敬之少者愛之富者安之貧者恤之賢者尊之不肖者容之人稱之曰公能厚鄉里者也公之有無相通貨者順所求而假之不責其償困者因所求而周之不望其報人稱之曰公能濟困窮者也公之與人交際正而不驕直而無訐人有是非辨之必明事有曲直折之必當人稱之曰公能長於公斷者也有忿爭公發直言曉喻而怨自釋者不知凡幾也有訟獄者公出已財和共而紛自解者不知凡幾也蓋公隱君子也惜乎不得試於朝而為天下之善士焉公生天順癸未四月十八日卯時歿嘉靖癸巳五月初一日未時享壽七十有一塋下嶺塘東山月形卯酉向娶邑南葉氏女名瓚生一子若茂四女長換適商山吳滔次女連適浮潭許森三女權適以川孫維四女兒適邑西邵大慶生一子若振二孫曰意曰同惟意能承薰陶有賢能稱子若茂者不忘父德奉以行實請狀

予也不文幸獲受知於公固不敢辭因其畧而狀之以附家乘之末不敢抗之以為高惟務覈其實而已俾他日執筆者尚有稽於斯謹狀

處士東山公行狀

近溪沈梅

處士諱尚志字克能東山其號廼補間尉儀公念七世孫也自祖禹公遷高源數傳曾祖彥廣公才猷拔萃充萬石長四祖志鰲公有惻愷羞惡之行父文瑞公篤實純謹確守先業毋邑南葉氏社嘉靖壬寅九月廿六日合塋廿九都南塘口行者狀猿猴掬衣形辛向生處士自幼端謹好禮及長經歷江湖吳越齊魯之區所至名山必借良朋以適其興訪逋仙故廬謁岳武穆廟拜王梅溪祠非特為旅之墳也者矣囊充業弘年花甲棄商歸梓里逍遙杖屨日與親舊坐論嘗剖已產便乘倡建宗祠凡戶役奉公應私綽有條幹選邇咸稱為有德之君子也距生成化丙申九月廿一日壽享八十以嘉靖乙卯二月十二日疾終正寢塋土名馬珩金塘塢仙人望月形影中穴寅向改塋巴庄宋家塢齋堂山飛鴈投湖頭上穴甲向配邑南汪新公女名寶金聰明賢淑內助嘉靖壬子仲冬月十八日塋土名黃栢嶺長塘尾風吹羅帶形結中穴坤向為之已山也子

三鳳娶邑南葉玘女名柔龍娶斗山程煌公女名辛鳶娶汉口孫有明公女名向長女適陽湖尚義孫文洪鳳男大遂娶邑南胡銓君女名轉大亨娶上山吳傑公女名救女奇英適邑南蘇尚賓龍子大常聘汉口程紀君女名益女長英適首村朱天榆次適珠光村閔三元鳶生子大有皆非凡之器也兄弟繫賈錢塘求受業門下泣血請狀予得以知處士平生之盛譽子孫之賢衍其非尋常者之可比也故書其行彖誌銘於墓者得有所考云

處士竹山公行狀

邵齡

處士諱岩茂字克昌號竹山其先禹公自祁邑左田遷於高涖傳及處士有二十一世矣然猶家業殷隆人才蕃衍允為黃之巨族也處士賦性溫和立志高邁動容貌常戒暴慢出辭氣欲遠鄙倍事父母不怠一本之恩待兄弟每篤友于之義盡服勞以敬長推愛育以畜幼交友必效金蘭之契居鄉欲追親睦之風隨寓安分取與比家遇剛者不畏遇柔者不侮富者不惟不求貧者不陵不辱其理家也生殖以開其源勤儉以節其流豐以待人約以處已凡持身行事與其奢也寧儉其為商也貿易雖為畝利之計而能不忘象江湖雖紛華之場

而能不縱欲相時以酌變易之權見機以趨儉夷之宜遇佳節無失時之樂過笑景有登望之志及夫老年業倦喜好幽雅優遊山水得失不形喜怒交際無間物我惟修身以俟命而已處士抱病三載子意者侍藥餌奉飲食扶起居時問安固不以三載憊怠亦無一時離側處士雖歿而意克幹先人之盡足以樹立家聲不有事死如事存者乎處士生成化壬寅二月二十一日丑時歿嘉靖乙未七月十三日寅時葬下嶺塘與父同穴卯酉向初配鑑潭吳氏再配商山吳景原公之次女也生一子曰意配商山吳氏瓚公之女孫三玄端玄靜玄義皆俊傑之士繼述可擬侯配名家一女孫迎章適溪川王以旂縣學生員子意常以公德求狀嚙不忘亟畱光昭以不朽親德也予因其父行而狀之以慰其孝思之意云謹狀

處士賜谷公行狀

游醇卿

處士諱育字克寬賜谷其別號也晉新安太守黃積公之後歷數十世曰禹公者由祁門左田始遷今居大父志鰲公剛毅有為承先裕後父觀盛公幹盡克家增大先榮孺人吳氏慈淑溫良處士之生幼性敦重不妄言笑比稍長親友

隆師德器成就家庭躬菽水以奉二親承顏順志妣卒後一妹大歸孳妻奩像
為裝送畧無吝色庶弟曰應性甚驕蠢撫愛而訓教之卒化為賢年弱冠往商
錢塘未幾商且興之條理悉交納賢士大夫博通民情物理是以智識日益精
明俾於壽應鄉人有窘乏者調之不責其償有姓卞者為盜所誣推已實與訴
其寃卒得免死其與人交際彬彬言論藹然其和其治家敬老慈幼衣服飲食
儉而有節平生制行大率類此鄉里無賢愚長幼咸稱其為吉人以嘉靖庚戌
六月二日疾終於家距生成化乙巳九月廿七日享年六十有六配有村朱氏
諱添亦生成化甲辰卒嘉靖庚寅得年四十有七嚴明賢淑僅生一子弗育勸
娶側室金陵徐氏生子三曰賜娶山斗程氏曰資娶山斗程氏曰貯娶月潭朱
氏以今十月七日奉厝於遐川二十畝灣麻榨園其子賜諫慨德誼嘗在休邑
會予於官邸甚相契洽茲旬旬以狀為請予惟三代既還人情微諷孰肯重家
而輕利哉今處士捐所有以與人而不靳救其死而不責其償孝以奉親愛以
友弟和以交友殆亦人所難也因叙其行實之大俾永為子孫法而垂諸無窮
云

處士坦軒公行狀

方山黃福

族人高源黃子萬盈衰麻匍匐來告余曰盈不天方失吾母將滿一月又失吾
父哀哉人子之情甚所不堪也唯吾父母苦志孝行動儉創業父之德字於鄉
閭母之賢洽於閭閻伊誰傳之者唯先生文與望俱時感信之且盈素辱注愛
乃庸聞知于吾父母敢乞一言其丕昭之念曰咨爾盈其悉爾言俾余次之遂
次之公諱景義字子宜十萬公禹二十世孫其先縣尉祁門儀公之後也咸以
耕讀傳家迄公祖志賢幼而失父卓然自立生有二子以名教曰宗振曰復振
宗振公之考也公生賦性剛毅秉質恢偉年數歲嫡母朱氏孺人產故父繼娶
母劉氏前生二子恩養厚加然母雖甚有偏愛而公惟以悅親為念父母愛者
亦愛之然慕無動于衷識者奇之甫長即有卓立之志一日獨立於庭下喟然
嘆曰蠱焉弗幹非承考也大孝不匱小則用勞今吾屋家業蕩廢之餘立身親
養無措非可以安居而逸處也乃托隣人福齊者引道欲為經商之舉不意劉
氏偏執不容中輟踰年公奮發獨往湖廣以從兄是念劉氏亦無所顧恤至彼
未暮年聞父病篤公冒雪亟奔歸父已歿矣公哀痛迫切乃廬于殯側思慕不

置事劉氏益加孝謹由是劉氏亦因之而底豫鄉人稱之公年二十有五方娶孺人孺人諱福姓許氏其邑之行田充富隆翁之女也孺人德性溫厚克守婦道處妯娌以和以敬遇奴僕用仁用恕晚姑雖性厲亦能曲意承奉誠公之一賢內助也及劉氏卒遺妹一曰好年方七歲公曰吾父一氣遺也孺人撫之恩若母子後擇配名家既嫁出已賞以為粧奩費中外咸以賢稱厥後公挈餘賢往閩貿易於建陽之地閩之善士咸服公之誠信樂與公交久之家業漸起乃思故居殘壞不容卜於舊居傍左構屋為燕壘謀規制宏備以朴素是務不尚華靡公因別號坦軒云公平生輕財仗義持正闢邪貧者濟之難者排之鄰里之事無間巨細咸取中於公九經公之剖析者無不悅意服從嘗居于閩有梅林汪時克者與閩人忿傷閩人幾危鄉人給其父曰毋用醫治汝子死商人自應償命公聞之召其父而諭之出金帛以為具藥餌竟得全活其人後拜謝曰生我者父母活我者公也願沒世無忘焉汪公知之亦持金帛以叩謝公一無所受由是聲聞益播公之設心制行多端舉此蓋可見矣嘉靖己丑十一月十六日公以疾終寢寢是生於成化丙戌三月十七日享年六十有四孺人生於成化丁亥九月初三日午時卒於嘉靖己丑十月十六日酉時壽享六十有三生一子曰萬盈丕振家聲有光前烈娶京村程氏柔順賢良孫三曰順昌順迪順時皆有穎異之資女孫一曰旺適商山吳浩盈卜庚寅年季春月吉日奉曆于上苑之陽余觀公之夫婦雖往矣而德行之昭著在當時者窮乎公之于右俾盈持之以請銘于命世者

黃隱君雲曼行狀

北崧吳應奎

自有史籍以來岩穴卓行之士有隱沒傳以載其潛德幽光如黃徐申屠諸人初未嘗膺一命居一取皆登名史冊流芳百世而不朽叔世以還惟勲宦循良忠孝文藝之徒得入列傳遺逸雖有傳祇具文耳得其實者固鮮而湮沒不載者蓋多矣噫士不幸而生斯世雖有奇氣疏節亦無所托以傳於後而與草木同朽腐可慨也已世之君子懼其沒世而無聞也故求行狀誌銘於賢士大夫以永其傳亦史外遺法也吁其亦不得已之心也哉高源隱君子黃公者以五月終於正寢遺命其子懷德曰狀吾行者必以屬吾壯松懷德趨福州泣血求狀于予予與公蓋有通家之好者其何辭董按黃氏系出姬之苗裔封于黃遂

以為氏唐大曆曰儀者為和闔尉始家邑東之左田禹公自左田遷休之高源代有偉人大王父彥忠王父士慶父質皆有隱德公諱雲旻質公季子也幼而敦厚周慎不事浮誇年十二而孤哀毀如成人事母用力無所不至閭里咸推之治家和而有節恩義兼盡家人宜焉處鄉人久而能敬與朋友交切切惇惇意氣之孚懇懇如也故親戚咸無所失家素涼薄蚤有樹立堅若制勵躬耕以自給而讀書不輟遂了經史諸子大義教授于鄉諄諄不倦出其門者皆求脩自立鄉之評善誨人者必稱公焉公有安貧樂道修身俟命之志至老不渝病革屬其子曰吾平生積善必有餘慶汝其勉之勿謂不得為善之報而自怠也卒于嘉靖甲辰年五月十八日距其生成化壬寅年五月二十一日享年六十有三配邑中汪氏柔善慈順克盡婦道子男二懷德娶郡中程氏憶德娶程氏女四聖弟適大坂汪良佐為弟適大坂汪資顯弟適會里程文儀滿弟適鑑潭吳齊公之沒無以為葬鄉人多以求狀為迂承思叔度之牛醫孺子之躬稼申屠高士之漆工何貧且賤也秉史筆者登之高士傳以傳之萬世蓋取其德足以範世而弗計其遇之窮也公之德雖不可以望黃徐諸君子然貧而無諂老而益壯亦一鄉之高士也生既不遇于時固不幸矣死又無聞于後是重不幸也予深悼之故為次其行之大略以俟觀風者采焉董狀

處士月山公行狀

虎岩朱雲

先生諱通理字元一號月山黃其姓也其先世有禹公者自祁門左田遷居休之高源世有偉人曾祖文憲祖景功父朴齋皆有隱德先生七歲而孤母張氏栢舟自誓有斷織教子遺風先生幼而至性居朴齋喪哀毀如成人識者稱之曰是必高大黃氏之門者稍長游胡雲野諸老先生之門潛心經史通春秋尤善屬文諸名勝咸推重焉弱冠游邑庠有聲以母老而家政叢委恐淹留於學遂援例入監嘉靖十八年己亥掛選歸專以養親為事凡所以承顏順志務得其惟心者無所不至宗族稱孝焉先生治家嚴而有法內外斬斬恩象之篤怡怡如也處鄉人恭而有禮犯之者多所不較故賢者服其量不肖者悅其化先生外和中實與人交始終一節世之言久要不忘者必歸焉家素充裕嗜篆輕財周人之急如恐不及在京師嘗以貴假宦遊之貧者入雖負之弗計也後以訪友復至京師遂嬰疾抵家未數月則病已革矣先生自知不起囑家人曰修

短有舍吾無所恨但不能奉養慈親為恨耳又曰吾幼而失怙未得盡一日之
養意欲發迹仕途以顯親於地下何天奪我壽竟與碩遠死不瞑目矣卒於嘉
靖二十二年癸卯五月初七日申時距生正德八年癸酉三月初三日辰時享
年僅三十有一配邑南汪護女性賢淑操節永霜子三人鏤娶演川胡啓女金
娶鑑潭吳濱女銘治進士紫聘京村程法女方先生沒諸子皆幼未有狀其行
者故誌行嘉言彙至湮沒平生所為文亦皆散逸無存已十五年於茲矣金銘
皆從予遊以予嘗得親炙先生之言行屬予狀焉予思先生文章德業動容周
旋誠有道者氣象不奉蚤世未究其用不覺戚戚於心蓋有不忍書者然大懼
賢人君子無所托以聞於後亦不忍遺也故特次其大畧俾請銘於知德君子
云

處士義齋公行狀

汪仁峯

處士諱義齋字以振倫堂篋二公之孫信公之三子也母揚氏歟西北隅人處
士之生氣稟剛明才猷宏大故厥考委之經商處士憚其心力尚德下賢經營
有法播振家聲不十年間囊貲豐盈然以里役戍後門戶叢挫披星帶月不遑
寧處辛苦備嘗識見日增閑閭稱其蕪能家庭懷其孝友父卒克襄大事躬淑
水以奉慈闈嘗戒目連齋三載弟懷入監捐資以助又能寡嗜慈薄茲味與童
僕同甘苦人咸以遠大期之距生正統庚申十二月廿八日以成化乙巳三月
廿二日卒於六安僅年四十有六扶柩歸葬五十培塿配孺人程氏五城名族
孺居二十五載綜理勤儉豐蒸嘗以祀祖先慎局鑰以實倉廩節操可嘉生正
統庚申九月十九日卒正德庚午正月十六日享年七十葬梨子充子男五人
曰文娶吳田嶺程氏曰武娶梅源江氏曰道娶霞塢吳氏曰達娶山斗程氏曰
相娶本里朱氏女二人曰茂適清漪姚應隆曰珎適本里朱儼處士卒先二十
五載厥配程氏孺人卒於今年其令子曰文曰武與予為莫逆交恐考妣沒而
無聞因請為之狀予于處士雖為素昧然觀令子之氣象足以知處士矣孟子
曰天將降大任於是人必先苦其心志勞其筋骨所以增益其所不能今觀處
士蚤年閱歷艱苦而愈長其才猷雖耆其壽考而又隆其子孫則孟子之言不
於是而可信耶且孝以奉親而薄以處已慈以御下而嚴於課子是又人所難
也因詳其實俾表墓者有所考云

處士樂泉公行狀

吳北松

處士諱文字世斌姓黃氏黃微之著姓也六十公自高原徙居倫堂倫堂之族亦昌矣曾祖諱箎祖諱否俱隱德弗耀考諱義齊志行卓越妣程氏慈愛勤恪為不孝仁孝盡而子道庶無愧矣雖時值中葉而意以承考幹蠱用勞齊公喜曰有子考無咎矣無何義齊公卒于六安踊擗如不欲生曰家未造諸弟幼遭罹荼毒吾何不幸至是哉涕泣匍匐扶柩歸葬喪事無違撫育四弟教誨克樹立友愛殊至白首不渝居常以勤儉孝教誨子弟身先率之故黃氏之子孫彬彬多禮讓天性質實不事浮誇於凡居室之用度親賓之接御上下之使事無不合宜稱情者生平無疾言遽色愷悌夷易忠厚自持未嘗啓口及人過失人無不樂就為嘗詠衡門之風衡門之下可以棲遲泌之洋洋可以樂饑曰古人無求自樂有如是也吾何事外慕哉因以樂泉自號以志厥好見之聞之者咸敬慕之以為黃公之樂其樂超卓不為俗汚不為時濁其無懷葛天之民欵配程氏早卒繼娶程氏側室韓氏子男一曰廷節即韓氏出也孫男曰天誠天詔

孫女曰貴英貴汝德汝處士生成化已酉九月歿嘉靖己亥八月享年七十有五是亦不為不壽矣厥子廷節請予狀因歷述之俾君子之銘者其或有採云

府君南樓公行狀

孤子瑞

先君諱道字世理別號南樓姓黃氏胄出祁門左田秘書省正字益遜公之後奕葉相承數傳至禹公遷於邑之高原又歷十三世諱六十公遷居倫堂高祖諱箎曾祖諱仕信祖諱義齊皆有隱德祖母程氏生子五人而先君行三也先君生十二歲而孤祖母愛而能勞不事姑息常遣就傳一日歸請曰讀書何為者耶意者取周於身之用而已自今請視膳執事後以餘力學可乎祖母心知其可立也許之先君策勵就義黽勉樹立年未弱冠祖母命往營生業即忻以往不以孤幻為辭難而勤力不怠祖母喜曰昌吾後者必斯子也而人人亦是期之比壯與諸兄弟商游江越奇羸以平不立稽券義讓交悖克終也於是歲賈歲入常盈俯仰甘旨諸所充然而孝養無遺祖母孺人卒哀毀踰禮嘗嘆曰吾既不能就養吾父又不能就養吾母天地一罪人也思慕終其身焉事兄撫弟友恭純至自壯至老怡怡如也居家雍睦敦肅夙興夜寐洒掃庭內允為儀

則臨事剛果不執已以自是不形直以沽名內無陰忌削刻之心外無依違故
縱之態強者裁抑之弱者扶持之以故宗族鄉黨事之不直者莫不質於先君
而先君亦一一為釋之人咸推其公平焉嘗被命徵國賦於邑謂同事曰鶴之
股可堪重拆哉籍其所可供不臺臺督責暴吏是承不燦也於斛頭斗角取贏
以傷民生人莫不服其義焉年方耳順以孤之能自樹也即謝江湖樂立園於
九氓之不足者輒減賞之人之無告者隨力以周之厥性純朴勤嗇衣不重帛
食不兼味其於猷畝之勞創造之艱雖童僕疆以之多必躬致力焉至老不倦
嘗訓不肖暨諸孫姪以勤力不惰為法以奢侈怠慢為戒其一念兢業持守之
心未嘗少怠居常與諸兄弟姪遇飲輒辭笑語私日自以為天倫聚樂固當如
是也配霞鳩吳氏孺人純謹貞淑先君經營四方無內顧憂而家日益充拓光
前裕後孺人內助之力居多子男二長瑾娶金氏早卒僅遺一女聘臨溪陳道
興次即瑞也取洪方汪氏孫男五長天救娶由溪程氏次天叙出紹叔父子理
次天秩天彛天倫尚幼孫女二幼未聘先君晚年精力加健不減於強壯時鄉
里咸以耄耄期之而不肖亦自以為幸也不虞變出一時舉家號泣先君遽呼
而謂曰吾年至是汝若于若孫如是即死無憂也言訖正目而瞑歲嘉靖庚戌
七月初一日詎生成化壬辰四月十三日得年七十有九嗚呼先君逝矣不可
復作矣而孤之哀痛悲號寧有窮已重以不肖莫克昭潛德之萬一謹述平生
之畧以乞大方君子矜其志而發其幽焉

處士黃公志全行狀

霞洲胡大器

公諱志全休之古林人也父永政公生二子公即伯子志坦公為仲子公為兒
戲時言笑不苟鄉人異之年十四喪父服闋又喪母後先居喪不踰禮如老成
人嘗以家世業儒豪傑輩出及其父始為商而歆棄商就儒又懼家之弗給聞
謂弟曰儒固所以成吾身商亦所以利其家也古人有儒而隱于商者要之勿
以利害義焉斯已矣公服食淡薄不事華靡賓祭誠篤不用虛飾其游于外交
友惟敬接下惟寬雖處交易爭利之場一以禮義自律而弗苟也暇則手不停
披口不絕吟尚論古人必得其心而後已一日讀君子疾沒世而名不稱憂傷
成疾竟不起年僅二十有九使天假之以年則其造履必不止此也生弘治丁
巳年月日歿嘉靖甲申年月日卜葬本里上塘尾配山斗程氏生子銘殤女鑑

字鴈塘吳復初志坦公生三子悼公無後命其季子鏃後之曰必使吾兄永有常祀未十年志坦公亦卒鏃乃遵遺命以嗣公戚戚焉遑遑焉如有所失而不利其所有由是觀黃姓之兄弟伯姪皆無所為而為者也有古之遺風焉君子曰堯舜之聖道在孝悌而繼志述事孝之大者也鏃無有焉按黃姓出江夏黃香之後有元集公為晉新安太守因家郡之黃墩至唐初門縣尉儀公再遷祁之左田傳孫思敏公素有雄畧視古林地勝徙居之即今居之始祖也世祖君啓公苦心力學為世名儒而與朱風林學士公趙東山太史公相友善遂遺其子樞公北面于朱趙二先生之門大有所得

國朝聞其賢三徵之皆不就著後圃集藏于家高祖安民公曾祖維天公箕裘儒術大父世瑞嘗念曰自遷及今代不乏賢於是擇師求友自強不息深通經史尤長於詩成化間授儒官未赴而卒鏃予之門壻好學循禮他日必能克宗以予為世戚知公之家世甚詳請追狀之以徵于立言君子俾伯父之名獲垂不朽予故樂道之俟觀風者采焉樹之風聲以為世勸云

東園黃公志坦行狀

時菴俞楨

東園黃公諱志坦字履之東園乃其別號吾休之古林乃其世居也代有聞人國朝洪武初有諱樞者有司以明經辟請職儒學辭疾弗就高祖安民公字則惠亦隱德弗耀曾祖維天公字景高號嚮明齋翰林篁墩程先生誌其墓祖甫公字世瑞號屏山聲叟為世通儒篁墩先生見而異之遂與深交文章紀實見新安文獻志父燿政公字永政余從姑丈也二子伯曰志庵少即公也年十三而燿政公卒又明年從姑孺人繼以歿公蒞喪情文並致鄉人稱其少而知禮又十年志庵公卒無嗣僅一女姪甫五歲善鞠之長為擇壻歸焉儀無不備鄉人稱其篤於仁公初事舉子業以家蠱排擯弗可乃已至是幡然改曰丈夫不入巖廊要須旁行天下遂挾餘貲泛桐江過錢塘陟吳山之巔而望焉乃欣然嘆曰偉哉天下之勝殆可以終吾志而寄吾迹也遂定賈區焉然大抵商名而士行不汨汨於声利之域蓋其風味慕子長豪爽慕元龍特托江湖而隱焉者也公機圓而氣毅才敏而慮熟內外事有弗決舉者非公不可故家無失攻族無廢紀焉與人處由之然借而不自失人愈見其可親故通士嘉其行高士樂其志自大夫而下及鄉里擇交者皆交口稱之曰東園東園云又無於六藝葉

筮之類亦旁通之尤善景測卜親之歲弗苟就人或以利後訾之公曰茲非救貧之術陰陽之義弗可誣也且人子之伸其情事者亦惟欲吾親而俱安爾識者疑之其置菑畲無上上無下下或曰肥公曰子孫其必皆賢乎或曰瘠公曰子孫其必不皆賢乎故其產業豐於先代誼不遺親惠不棄貧自以學業未成每勉人以警急語且引駑驥蟻蟻之喻嘗語余曰吾有不孝罪二幸而二親無淺土之患今始追其一而尚有二世之遺文未能壽諸梓非過逸前光者乎將訂刻以昭先澤先事而卒時寓浙之德清捐旅邸也嗚呼悲哉公生弘治庚申正月初七日歿嘉靖戊戌八月二十日凡歷春秋三十有九耳配鴈塘雅菴吳公女納洪氏子三人鏐娶鴈塘吳氏鉦亦聘鴈塘吳氏鏐聘霞阜胡氏鏐鏐吳出鉦洪出余知公最稔者因公之孫以其不朽者屬焉敬撮其大槩而為之狀云

處士松谷公行狀

白野胡文孚

處士諱昇字景高松谷其別號也曾祖彥忠柱石鄉邦祖士春富而好禮父文憲卓犖才猷與創大業配耦人程氏生子四人處士其季也自幼端重如老成人舉動言笑不苟長偕三兄商遊錢塘不屑奇贏之務惟愛弔古尋幽性仁慈好施與於行道中每遇饑羸則致嗟閱或值凶歲悉傾帑以周匱乏弗能償者輒焚其券而弗與較嘗念古云積金以遺子孫不如積陰德為長久計是以倡建佛子林茶亭重造全真庵字構顏公山巴嶺路亭為善一念孜孜不少間人有不善則和顏以勸其改其有善者則推贊以俾其成是以鄉里交稱處士為樂善君子然才智渾深與創基業彌新彌盛足以垂裕後昆以嘉靖丙戌正月月初十日亥時終於正寢距生景泰甲戌二月十一日戌時壽七十有三配避川朱氏志豪君之女孝奉公姑慈鞠子媳允為內助之賢側室孫氏終溫且惠勤儉自持生子二長修德娶陳村陳虎女次明德娶遐川朱萬方女女三長適商山吳呈次適坑口孫元三適回川顯孫男一曰順受子姓等以今甲午十月初四日丁酉奉處士柩合朱孺人葬於巴庄之言克坐乙酉辛夫自大道既遠中靈日滿民惟緇銖之較而互相攻奪求其周貧恤匱而務陰功之積者千百不一也予嘗喜道人之善矧處士樂善之心無窮且令子與予相得最深拳拳以狀為請安得忍然而無以應之耶因為序次平生之大致俾表其墓者得

有所考而永垂於後

處士清源公行狀

圭山邵齡

嘗謂天下之抱義戴仁道選林壑者非得青雲之士表而揚之則湮沒無聞古雖有隱逸卓行孝友之傳而珠遺滄海者亦多矣今年八月清源黃公以疾卒于正寢二孤盡哀苦塊而走幣求狀于予以彰公之潛德蓋覩隱逸諸傳而有感者也予與公族有姻好夙知公歷履其何敢辭謹按黃氏系出陸終之後世家祁門之左田門望之高與王謝崔盧齊軌至五季時禹公者自左田遷休陽之高源代有偉人曾王父壽童公曾王母汪氏王父文憲公王母程氏父雲昇公積功累行有光前修母朱氏亦徽柔婉順克盡婦道無出庶母孫氏生二子公其次也諱明德字高本別號清源幼聰慧有至性不與群兒嬉戲昇公鍾愛特甚嘗賞之曰是兒性質頗異于人其明明德者乎稍長好琴書樂善循理以孝友忠厚著稱事父母承顏順志人無間言甫弱冠昇公朱氏相繼云亡公居喪哀痛迫切情文咸備嘗千里冒雪奔赴塋期遂膺末疾行步微蹇衆皆惜之末世俗漓彘有角弓之反目之禍非剛腸者不能免公篤于棠棣之恩明于刑

于之象與兄竹軒公構敦蒙堂以居怡怡罔間雍睦之美可為世範治家恩象蕙盡夫妻相敬粗有部缺龐公之遺風鄉黨咸推焉其與人交終始一節友聲之求雖艾弗替也蚤自樹立堅苦刻勵客于江浙能生殖以道不屑於販夫販婦之謀雖寄跡市廛而擇交士林服禮衽素自若也性喜賑施恤匱調窮如恐弗逮嘗值歲大侵公傾貲稱貸而不責其息全濟甚衆有疾病者則製藥餌以救之人受其惠而公不自以為德也邑南有巴嶺逶迤數里往來者艱于懋息公乃捐貲構亭於其巔以便行人其濟人利物大率類此晚年德盛禮恭鄉里矜式而公已告終矣公生正德丙寅五月十八日寅時歿嘉靖庚申八月十四日午時享年五十有五配避川朱萬方長女懿德媿美助成家政生女曰貞弟天亡側室朱氏生子二長曰順受娶簾溪陳球女次曰順承娶鑑潭吳音保女女一曰竒弟聘倫堂金潭孫二長曰銓順承子次曰鏗順受子二孤將以八月廿五日奉公柩安厝于本里之舊宅予惟公孝友性成忠厚天啓律已之貞濟人之惠誠無愧於竹帛所載雖未嘗登仕籍居膺任而潛德逸行所以正鄉閭厚風俗者亦弘矣是宜表揚其素履俟司國史者擇而採之以備隱逸孝友

之選謹狀

處士大初公行狀

張思谷

君諱大初字孟起晉新安太守積公之後曾祖諱勝祖祖諱真奴積德累仁鄉
稱長者父諱若虎豐貲盛業眉壽康寧行重鄉邦母臨塘金氏生子三人而君
居其長自幼端重言笑不苟長而益自策勵事有關於家門者悉以身先與二
弟怡怡克篤孔懷之誼高堂菽水孝養二親承顏順志不少有遠涉江湖與
人交際彬彬言論近悅遠來以至囊橐日充基產日裕且周窮恤匱凡有患難
爰方救助婚姻死喪慶弔禮無所失或有為不善者則廣譬博喻務令其改人
皆以王彥方比之謂其為有德君子晚節優游樂善渾無外慕之心惟以恬靜
自守日與其子講論修身行己利物濟人之事暴傲之言未嘗出諸口惰慢之
行畧無設於身不愧不怍無貪無求允若葛天無懷之遺逸也與娶邑南夏氏
聰明賢淑生子文琰幹蠱象賢君生宣德庚戌卒弘治辛酉享年七十有五厝
千里之白塔口丑山未向文琰舊與予為莫逆交一日造予仁峯書舍告曰先
人沒今已三年矣恐其行落寞無傳知先人之實者莫若使君也乞煩一言庶

有以慰芳魄於九泉乎予謂莫為於前有美弗彰莫為於後有美弗傳昔曾子
謂孟莊子之孝其他可也惟不改父之臣與父之政是難能也子果能心父
之心行父之行則汝父之美益彰而孟莊子之孝亦可企而及之矣子而懋之
則所以狀先君之行者寧不在於此哉

處士孟和公行狀

吳郁

君諱福旻孟和其字也為初閭尉像公之後由左田而遷今西坑高宗祖考皆
仁厚長者母新渡方氏生子四人而君居其四自幼精爽英銳讀書過目即成
誦異於群兒比長侍諸兄隅坐徐行討論典故曲盡物情壯而經營湘楚攬勝
搜奇不數年間利獲倍蓰常謂積而不能散守錢虜耳於是凡有尫羸困瘁之
人悉有以賑貸之而不急其償弘治間本邑造夏紋溪橋架屋其上巨費難成
特捐已貲以助成之二守三山李公感其賢累以鄉飲酒請君娶程氏淑賢生
子文珏側室張氏生子文駮君晚年篤而教之嘗謂珏曰大丈夫能龍墀獨對
而金殿臚傳者上也能羣彥士而中式秋闈者次也能以才幹而進用於明時
者又其次也汝既不能為其上可不為其次乎於是珏益自策勵果由監胄而

授中書鄉里以為榮君於弘治癸丑疾卒于家距生正統戊午享年六十有八以某月之吉奉柩厝于里之下宅山坐丑面未其孤文珏於京師與予相得泣血以狀其行為請予謂之曰狀父之行以垂諸後固為孝矣汝能立身揚名以顯父母不又孝之大者乎子其勉之

處士文琦公行狀

癸鶴程同

君諱琦字叔寶東晉新安太守積公之後傳十五世儀公為祁閭尉家于左田歷數世孫忠公由左田遷今西坑曾祖音奴祖岩丑考福道俱仗義履仁樂善好施妣徐氏生君洒樂通明才猷拔萃挈維貫於江湖好賢納士允有元龍之氣然智慮淵深寬大中而能檢束和緩中而有規矩不數年而萬貫腰纏大關生產振立紀綱增光閭里既而生殖于楚之沅湘不屑務奇贏急於周貧恤匱正德戊辰歲大歉九饑乏者所借文券悉用火焚之其有骸骼枕籍于道悉施棺以塋之嘗謂年歲之豐凶由人事之得失也家門之盛衰由方寸之善惡也與其孜孜而不知止者謂之貪曷若默然而守者之為樂乎於是塑佛像于杭山寺中常往修齋誦經人或勸而止之者君謂從吾之好而已豈望福利之報耶正統丁卯以嘉靖戊子終於正寢享年八十有二宜膺魁帶之榮辭而弗就娶新渡方氏側室成氏生子雲侃娶新渡方氏女昭適山斗程琰嘗竊論曰惟德動天作善降祥者理也今君濟人而不怠其償為善而不望其報然未延壽考而慶鍾子孫天之於人奚有毫髮爽哉爰用表之以為有實行者彰亦以為行善者勸也

處士鍾山公行狀

趙雲峯

君諱文珠尚珎其字鍾山其別號廼閭門尉儀公之後曾祖聖奴公始創業垂統祖岩九公早卒妣夏氏守節撫孤父大樵公早卒妣金氏慈訓有方君敬以聽之佩服無忘甫弱冠經營于桐城之樅陽尚友親賢博識民情世故有無憂通斟酌錯綜曲盡其妙其有餘閑玩索經書子史智識日益精明方物出謀有如燭照數計是以與家創業鄉里羨其才猷心存正直人有非理之為必明辯而善諭之或有忿結鬪爭必從容為之解釋退而咸感服之晚處于家優游靜默每對佳賓上客高情雅量下榻傾樽有時徜徉散步川原以適溪山之趣桐城士君子謂隨時順理知進知退者惟黃鍾山而已君嘗謂其子曰少年須努

力進修老當安命樂天若貪得而無厭者聖人所戒也生成化乙酉卒嘉靖壬寅享年七十有八配林田巴氏賢淑而善理家子男二人曰雲育娶汪千金氏曰雲敬娶和村吳氏女一適陳村王鉞孫男二天曉娶邑南夏氏天暉娶星洲葉氏以今奉柩葬于里之下保坐子向午其賢嗣與予相得最深泣請狀其行予惟幼而孤者植立惟艱君能孝奉慈闈怡敦花萼親賢下士弘展才猷丕創基業者是蓋人所難也而君不自以為難則其平生之志有大過於人者矣茲聊次其實俾垂範于永云

處士中坡公行狀

先生諱玉冕字宗周中坡其號也世居闡里先生丰姿標格魁梧磊落不事表暴而威自嚴不尚華麗而文自著望之者泰山巍巍就之如和風藹藹先生性行端潔沉靜重厚溫潤如美玉純粹如精金家世耕讀內而孝以事親悌以事兄外而慈以使衆和以處隣敬以睦族庭無間言先生卓有大志相父成家創業垂統令可繼也男女有四皆嫁娶名家長女美玉有懿德適壽林曹玄有善行次潔玉適箬溪王瑄亦有德望長子金麒娶奇峯鄭公一鑑之女次金覲娶

文溪馮公南圃之女皆守婦道孝敬舅姑先生處親朋久而愈敬有古人風每慨世道澆漓迺迹岩壑樂隱林泉弄吟風月編修家乘垂裕后昆誠可羨也黃君生於弘治丙辰六月初四歿於嘉靖庚申八月廿五終於正寢二子皆能善繼先生之志泣血求狀予與先生素知先生之行實故狀之於譜以示不朽云

處士遇昌公行狀

嗚呼惟我先祖府君之卒不肖旣以嘉靖壬申年十二月廿四日奉柩葬於東莞源之麓復懼盛德未紀無以明示來世后昆是以疾目痛心以日以夜然事重大非託諸立言君子與夫縉紳先生則莫能尊信而永傳也是用不避誅責銜哀叩誠陳狀以請嗚呼先祖諱遇昌字文暹姓黃氏出故宗撫屬郎中有輝公後先祖生於洪熙年正月十一日遭家不造年十有四值曾大父仕汝公遠戍勞於王事久之不歸兄弟六人值在幼神若失教者然其孝友稟自天賦故能勤生務躬力稼穡以養我曾祖妣林承顏悅色罔有弗至又能以敦睦之行佐率諸弟使各就所業夫嘗少有供遊戲慢以棄日非禮者故終先祖之世弟姪內外男女爨而食者五十有六八九以听所指揮而就其矩度中無一人逆

命而少有間言者蓋有鄰門之羨而非張公之忍不能也所以然者咸以先祖履置得宜有以服其心故耳逮年三十幸獲天福其生祥下瑞布滿家室而創業之隆潛滋暗長凡有動作罔有不稱心而當意者生子四長新春次添春次勝春次萬春皆卓然有立然此何莫非孝友愛敬中來也又且事天惟謹不肯恣肆以珍物恃財怙勢以凌人教四子介然以安分知足自戒畏刑懷德為心嗚呼先祖兢兢為生有如此者况在當時親炙而目之者有不惕然敬畏而尊信之者乎是在不肖后昆尚能想其聲容遵其執範至今猶且不替嗚呼不幸以成化乙未年十二月初二日終於正寢媿不才難自奮揚昭揭光德聊撰次行狀實頌頌拜于仁人君子辱賜一言載諸墓石以示不朽如得允求幽明生死感恩於萬世矣

處士竹山公行狀

先生祁西關里人也姓黃氏諱玉璽字振之竹山其別號也先生生而穎異常學問於諸子百家罔不研究又於琴射書數之藝靡不工緻猶精於詩故常教授生徒以十百計若今之縉紳擢巍科取甲第者名出其門先生不汲汲於富

貴不戚戚於貧賤故家雖不甚豐腴而先生處之無不裕如且其性氣溫潤如和風暖日所交遠邇賓朋自一接外莫不誠輸心醉故鄉閭內外小事大事一日據分如庖丁之牛迎刃而解其孝友夙成愛養父母和樂昆弟以訓誨後人其規範繩度若不敢犯先生制行有如此者惜隱德不仕無以顯問於世為恨先生生于弘治辛亥二月十七日歿於嘉靖癸亥正月初九日其子長金詔次金騰俱在茂年必能繼先生踪跡而起不致落箔予又為先生幸也今予狀次先生平生行實載諸譜書一傳不朽謹狀

終

新安左田黃氏正宗譜卷之四

墓碑誌銘類

晉

新安太守黃君積墓碑銘

都亭侯陶瞻撰

君諱積字元集先世江夏人漢祁鄉侯瓊之裔孫今部將期季弟也累葉牧守
印綬典據十有餘人皆德稱其位名豐其爵而寵祿傳于歷世勞動著于王室
君鍾其美受性淵懿含和履仁治詩書兼覽群籍靡不通暢州郡更請屈已匡
君為主簿督郵入為貞外郎所在執憲彈繩糾枉忠潔清肅進退以禮允道篤
道篤愛先人後已克讓有終察孝丕行尋為祭酒上歆其德於招俯就羔羊在
公四府歸高國家東祚擢君為新安太守到官正席流恩褒善糾奸示惡旬月
化行風俗改易輻軒與戀飛躍臨津不日不月昊天不弔殲此良人以事註誤
卒官嗚呼痛哉臣隸辟踊悲動左右百姓號咷若喪考妣咳孤噴泣切怛傷摧
勒銘金石惟以告哀

於穆郡守天挺英特佐時理物紹蹤先軌積德勤約燕于孫子君之羣戚並時

繁祉明明君德令聞不已高山景行慕前賢烈庶同如蘭意願未止中遭冤天
不終其紀夙世實祚早喪懿美抱器幽潛永歸蒿里痛矣如之行路感動儻魂
有靈垂後不朽

唐

刑部員外河南令黃君論墓誌銘

簡州刺史李弘泰撰

君諱論字彥綸新安人曾大父諱德有名行春秋入仕太宗朝九三徙職六轉
官至高宗朝為御史中丞彈劾無所避由是出刺福州大父諱昂晉陽令父諱
景繼以儒學進官選為河南文學去官徐州使拜判官授協律郎君方質有氣
形貌開碩長於文學以進士舉博學宏詞于開元間為校書郎自績溪尉拜監
察御史為幸臣所讒與同輩五人俱為縣令三年逢恩俱從掾江陵不期歲吏
部奏君為判官改殿中侍御史不行拜京兆府司錄諸曹白事不敢平面視共
食公堂抑首促促就舖歛揖起趨去無敢閑語縣令丞尉畏如嚴京兆事以辨
君為禮部員外郎為觀察判官帥他遷君不樂久去京師謝去用前能拜三原
令歲餘遷刑部員外郎守法爭義棘棘不阿觀察使使劇吏案簿書十日不得

絲毫間罪改河南令河南尹適君平生所不合者君年且老當日拜走仰望階
下不得已就官數月大不適即以病辭免公卿欲其一至京師君以再不得意
守令恨不義不可更辱又奚為於京師間竟閉門死年六十三君娶新安王氏
子宗器將以其卒之年十月十五日葬城南來請銘於予予前與君為御史被
讒俱為令也最為知君銘曰

誰之不如而不公卿奚養之遠以不久生惟其頽頽以世厥聲

唐縣尉黃公儀墓誌銘

金華張志和撰

公諱儀字元和姓黃氏歛之黃墩人也先世家安陸任主簿督郵次考功員外
補祭酒守新安而歿塋姚家墩子尋因家焉十四世有唐禮部侍郎伯嶺者於
開元丙寅十二月初三日寅時生公公幼明敏習春秋仕為績溪尉廣德甲辰
轉青陽尉大曆丁未又轉閬門尉卜居左田先是公為官清儉愛民決訟如神
捕盜如見名動上官嘗受武薦為前鋒虜寇聞風卷甲爭遁不自誇功所領軍
士輸餉不給多困苦乃啓主將曰軍井未汲將不言渴軍食未炊將不言饑此
古人用兵之要也吳起與士卒同甘苦元帥豈無意於軍士而使之飽煖乎主

將然其言自是愛之如子每練兵必身先之曰兵不練何以防危暇日究經子
至夜分不寐以大曆已未七月十四日酉時卒妻績溪丁源洞汪氏生開元乙
丑正月初四日卯時有賢行家政巨細不以累公故公得專於功名實配助之
力以大曆戊午九月十八日未時卒子男益遜益光益謙益讓明年十二月十
四日以公合塋于左田溪東之夫子墩負已面亥謁予誌之予與公善不敢辭
且據實作銘曰

不卑不官功在蒼黎能擇仁里世世攸依吁嗟乎夫子墩秀且奇昌大不
朽其無涯

大明

處士士厚黃公墓誌銘

玉峯黃雲

處士自成化丙申三月二十八日卒迄今壬寅移七霜矣其孤茸盛者謂其族
之弟莆曰先君之懿行子詳知之當葬事嚴而茸盛失所以而惟不朽玄堂未
有刻辭子為狀吾持以請於立言君子茲茸盛以莆之狀來請考之黃氏之先
顯晦名迹譜牒承傳爛然可見世之稱文獻故家者莫加也處士諱維后字士

厚婺源州學正號天根居士諱立為高祖諱會為曾祖諱張福為祖諱復先配
金氏是生處士為父母處士父卒後五月而生所以鞠育教養成就之者實母
氏是賴其性敦厚質朴守已安分不妄為意外之求思亡事存鄉族稱孝享年
七十有六子男一即茸盛孫男三曰德堅德友德亨君子謂處士引垂絕之緒
行無已之慶可以考其所存矣娶程氏生永樂戊子於正統庚申先卒繼娶汪
氏茸盛程出也葬古林况家園合程氏之兆茲以七月十八日補為誌銘曰
邈乎黃氏帝所出楚人併之寫聖筆宋唐秦漢迄戰國代有顯者炳星日
志宜簡畧難殫述我銘處士辭尚質裕乎後兮後暨暨

處士黃公克明墓誌銘

仙源黃山焦煜

處士姓黃氏諱能遠字克明號存菴祁左田世家也其先緒出江夏東晉時新
安郡守積歿於官葬歙姚家墩子尋廬墓遂家焉厥後以姓而名其地為黃墩
傳至十五世孫儀為祁尉因家左田而雲仍耕衍代不乏賢至處士凡二十有
五秉矣處士父顯政翁生六子而處士為最季幼有至性甫三歲失侍抱尸悲
慟就食其乳哭踊失聲里閭聞者咸為酸鼻淚下繼妣方氏鞠育如已出而處

士之事方氏亦如已所出既長孝友淳篤兄暹死寧國處士奔求其尸號勸食
缺扶視還葬撫育二孤至於成立處鄉族親黨無內外少長疎戚咸以朴直溫
粹熙然無忤不為斬險刻削不好評列人長短其出入取與不苟常語人曰貪
婪生於濫費苟得起於怠惰吾惟勤儉不渝而已嘗分產自取碗瘠惡弱無較
心捐資鳩工造黃村干坑等處橋路無吝色人有紛爭務為解釋人亦得其一
言而服究意岐黃之術方脈延劑各彈其妙人有疾無貧富輒躬往診視投藥
無所活甚衆不責報時論翕然備之曰此重醫復世也處士姓行有過人者類
如此卒于嘉靖九年十二月戊午距生成化三年十二月壬辰享年六十有四
配程氏系出大家閨壺內助稱賢生成化九年六月丙子卒嘉靖二十三年九
月辛酉子二長瑜娶李源李氏次璋娶大溪吳氏孫男三時裕時澤時泰女未
第適同里吳氏珀嘉靖四十二年四月十二日瑜璋奉處士暨厥配柩改葬太
平縣汪豪嶺至是以狀泣血請銘予惟處士之賢殆可銘者遂弗克辭銘曰
有赫者黃厥惟巨宗左田喬木碩以日崇處士礪德槃澗之容孝友篤義
勤儉肅雅厥配賢淑貞一是從考終以正同營窆封山澤秀麗燭樹棠意

永藏於茲泚氣攸鐘

處士黃公斯才墓誌銘

平盈方一

君姓黃氏諱斯才字本善世家婺之槎溪維槎溪鉅族代有聞人其諱宗慶者
君之曾大父也諱福者君之大父也諱克軒者君之父也母程氏昆弟四人君
其孟也君性清介公直和夷澹朴不嗜聲利與物無競嘗曰禹稷躬稼周詠豳
風吾既弗抱儒業以為世用舍耕奚適哉東作西成以勤為樂其奉父母以孝
而竭力祇養其撫諸弟以愛而不啻若子其處隣里以和而人無間言娶金氏
三子彪豹驥俱蚤世安於天命飲酒自釋殆忘其伯道之悲也嘉靖戊戌正月
以疾卒於正寢親族知識罔不哀之葬於里之何坑井塋與配金氏同壙長男
龜附焉距所生成化癸巳十二月得年六十有六女志玉適環溪程拱遺腹女
兆玉側室 氏出也既長孀于家子國賓先是君之姪希養嘗同予講甘泉湛
夫子之學又與君之季弟東樓君為莫逆交遂卜婚媾吉肆冢子為君之館甥
君卒之十有九年布養狀君之行求誌其墓動懇懇情懷藹然且曰幸母斬
一言以紀伯父之實以紓吾子姪之餘恨也予觀君行誠可謂一鄉之善士也

已顧予奚足以發潛德之光哉今屬至戚情不可辭乃序而銘之

銘曰伯道有子何以流聲淳如無女何以存生懿惟黃君善在鄉評擊壤自怡天倫克誠無忤於物無怨于冥三男弗壽一德自亨猶子蝨說二女蘭馨嗚呼疇謂天之不可信而善之不可憑勒諸貞石百世是徵

處士黃公觀蔭墓誌銘

劉文和

黃處士者新都欽邑之竦塘里人也名觀蔭字以初太父新生子浩浩生四子處士其長也處士之子壽山請銘其墓之石余曰嗟乎昔人所稱向子平王孝方者如處士者非耶處士生有至性孝友純篤幼敏慧誦書輒曉大義浩公顧而喜曰斯兒殆繼吾志能亢宗矣長益嗜學繙閱經史百家言然不務誇靡希進取惟玩繹涵泳以求自得一時碩儒咸謂處士得近裏者已之學平君以禮自律未嘗少苟與人交不輕為然諾讓卑自教即有以非禮加者第憫其妄弗校也處鄉恂恂言若不出諸口而事遇盤錯糾紛指顧剖決神采英爽有毅然不可奪者其生平懷抱疏逸雄偉時論多以申能展用相期而雅志林壑卓行範俗識者益以此多處士不謂處士草野間人也教子壽山朝夕不少間或謂

處士君惟壽山一子獨不少寬耶處士曰嘻正以壽山一子不可縱也識者黜之生元至正甲申五月卒永樂戊戌享年七十有五娶許氏生子男一人即壽山也娶史氏繼娶鮑氏孫男二人道玄娶吳氏側室李氏佛生娶鄭氏繼娶江氏以其年某月日塋下塚之原余為之銘銘曰右有金竺左有珠岡中有佳阡如斧如堂於萬斯年萃靈發祥

霍州判官黃公原祐墓誌銘

劉文安

霍州判官黃君者欽州竦塘里人也名原祐字以善先世德望詳在史冊東晉時有名積者掾江陵後守新安終于官子孫留家不去唐有論公者中宏詞科與員半千崔融齊名尉績溪有儀者以春秋起家尉祁閭蓋世有聞人云君之七世祖百二公兄弟始居竦塘父曰同公母譙氏生君修髯偉幹富文詞入辟雍名與何蕃埒銓授松滋尉有以官卑唁君者君曰稱職無卑吾奚高之豔也潔已畢慮松滋之民安焉改尉通城治如松滋嘗道江陵入江夏探先掾尚書遺券以光前列自期已而擢判霍州霍古三晉地也土瘠民貧地險俗豪君因俗為治而民咸和歌之曰民何以康國有龔黃我霍不空黃君之功既而君以

年老致政歸焉卒於永樂戊戌錄生元至正丁亥年七十配宜人謝氏子男四人壽康壽京壽廣壽福咸克家以某年月日葬君于上前山側室金程二氏柩葬君塋為之銘銘曰官弗稱德德則宜民施弗究才才則缺声埋珍瘞玉前山之麓不竟其祿子孫之穀

處士黃公謙合葬誌銘

余古峯

處士諱諱字井讓顧名字義以自牧扁其軒人遂稱為自牧軒翁云處士蚤孤有至性雅志林壑慕靖節高義時以詩書自娛生平足跡未嘗至城市蹈善履素以正其家門內穆如也每謂子若孫曰母以善難為而不為母以財勝物而傲物惟勤業可以繼先惟知學可以淑後時以為名言娶溪南吳氏貞淑慈惠生子曰應韶應蘭應麒咸賢克家處士與吳孺人益謹處士詩酒琴書丘園山水日陶陶然自得也成化丁酉考終於家距生永樂甲午六十有四年吳孺人卒成化乙未距生永樂戊子六十有八年以正德戊寅臘月下浣合葬石坎之原嗣孫鍾懼世遠無稽將潛德闕泐不傳余適奉 璽書壯還過魯乃奉狀并其家乘求銘焉閱其乘甚核故不復詳厥家世為銘歸之銘曰疎塘之靈黃氏

之英世有令德孕秀闡新詩書治業名義尊榮卓哉自牧安享天民清高湛月古志厲雲倚彼吳淑埋玉同塋銘肩山珉勢永嶙峋

處士石山黃君墓誌銘

徽之初門黃姓者族甚蕃名甚著予意其代有聞人而嘆不克盡見矣一日江子靜夫造石塘書院携其同志友謝子良慶所撰石山狀求銘于予予辭之曰銘以昭德考行予與石山翁素昧一識未聞其有某德某行之可述惡乎銘靜夫進曰謝子石山之孫婿平生不阿所好按其狀可以知石山為人大傑矣石山之季子曰時迺一鄉之望者觀其子可以知其父矣予素重黃姓有人而慨不獲盡於所聞乃取石山之狀而閱之處士諱高字廷傑別號石山徽郡守元集公三十九世孫也其先代儀公為初閭尉樂左田山水因家焉傳至四九公家聲大振始遷黑橋元季大亂國用起兵保障一方鄉人恃以無恐數傳至汝亮以端慤孝友聞乃石山翁之父石山家教淵源自幼卓有大志個黨不群無崖岸氣無荆棘心與物無競事有忤逆不堪者能自遣釋鄉人侵侮其貲業至訟于官而亡于獄公憐之輒讓不較弘治間克里役遭歲歉鄉人若國課不能

輸公惟以恤困窮為念鬻產完官不取擾于民民德之素行為有司所推重舉為耆老事每咨訪焉教戒鄉鄰亦唯以忍讓為先見有好鬪者則曰無逞感以亡身有好閑者則曰無怠惰以廢業鄉人薰其德而善良者甚眾其處宗族姻友之間皆有恩意其為人端方謹厚鄉都無貶論焉生成化辛卯歲十一月初三日辰時卒嘉靖壬寅十二月十九日卯時享壽七十有二配東溪仰文鑑公之次女德性溫良後石山二十歲而終生子三長曰春次曰曉三曰時女孫男三澤治仁孫文四魯孫男穎夢垣貺夢鼎曾孫女三以嘉靖己酉歲四月初十日巳時葬本里溪頭牛首嶺丁向未有銘嗚呼一善可稱也亦可傳也顧石山於予雖無一面之識與之銘以江子之求謝子之狀則處士為人可知矣此予所以為之銘也其詞曰牛首之雲爛然溪頭之水煥然觀民風者孰能如石山之賢於我銘者可以為世世之求傳

嘉靖丁巳歲仲春之吉

賜進士出身中順大夫致仕南京大僕寺少卿前翰林院掌院事右春坊右中允國子司業經筵國史中石呂懷撰

壽官士能公墓誌銘

俞卓

公諱才字士能一諱才童姓黃氏晉新安大守積之後所居高源高大父禹公曾大父茂公大父真祐咸有隱德饒貲產能世嗣詩禮為望於鄉考彥廣以殷碩舉耆宿妣芳溪程氏娘賢五人而公最長初就塾師能兼記群蒙之所習又之能文稍長修饒好家務為躬先世以尺籍隸廣西迨耆宿中年勾取頻仍家道小替公乃解內子奩歸出謀殫力佐理興復崇滋倍舊其事親孝撫諸弟友喪葬賓客之具節之以禮不浮不縮凡所出內權量均平無輕重大小之異舊居於盈邊宇災更拓中樓下之勝大新第宅奉先有祠造後有塾庑館廡既諸構雅備嘗以族鉅而蕃譜久未修迺沂自大守而上縣尉而下若僑姚家墩家左田以迨今居凡世系及遷徙履由旁稽彙輯為黃氏家乘成化間邑尹陳侯有惠政受代而遷公倡金宗敬輩建去思之亭勒石頌德以勸後來尤樂砥途梁津以至老宮梵剎茶亭渡舫之屬修舉廢壞揮金魚愛居常調困之拯孱扶躓惟患不及有以忿爭求質必正色法言是是非非不遷就掩覆務俾兩釋而後已晚以齒德並優恩授官帶鄉射屢請大賓名馳郡邑公自處醇謹不事

表瀑所植愈厚而持已愈謙不責人之犯人亦不敢犯平生利濟之績累數之不能終蓋魚媿於古篤行之士志弘治甲寅十一月廿一日以疾終於正寢距生永樂丙戌正月十六日享壽八十有九娶汪千程氏性慈惠勤相於內大殖有家猶不廢繼績念公季弟羅始生失恃乳育成之以已難嗣納星洲吳氏以自副生一子天賜早卒續納本里吳氏生二子天瑞天從程孺人亦先公卒孫男六人岩顯岩惠岩暄岩護岩茂岩振孫女七人俱適名族顯等以弘治丙辰正月初五日塋公于廿六都車田山之麓預來屬銘惟公始延余族叔復新主教家塾積數十寒暑情禮弗替人謂子弟有終身之師賓客有忘歸之館則獲聞公稔矣不可以無誨辭為序群行而銘之銘曰

源之高聖於黃公之高聖於邦不廟不廊于賓有光行無弗藏遺慶彌芳

處士動物公墓誌銘

俞柝

正德庚辰動物黃公以疾卒於商諸孤扶柩歸窆而未真者十有年矣茲始得吉於下克林先塋之次柝以館甥奔會塋諸孤屬銘著之壙恩誼所係夫何敢辭遂揮泣筆之公高場黃氏人諱顯字克明號動物軒曾祖諱彥廣祖諱才童

俱以貨產推於鄉考諱天賜明經而蚤不祿妣汪氏節行甚峻公少魁偉出言動履不類稚年八五歲遭厥考喪哭泣幾絕人不忍見形聞聲稍長惧弗克負荷先業日督農夜攻讀以自砥礪奉母理家內外井井遇事應物隨其鉅纖急緩若絲理櫛比不少紊尤篤愛二少弟無所貽大父累年十二憤群從奪其所有力追復之乃已應戶役為萬石長賦欵運輸咸適宜為一邑最既乃挈餘資覽勝江湖所至與賢士大夫交聞善言必服膺見善行冀與之齊材器大就有姦牙僧專利屬商且軋其儕之異已者公鳴之官屏回舉直以司資易凡其居積取鬻每預計贏絀竟如成筭未嘗一著挫衄不數年財利豐溢膏腴新輪與列庾建塾有用所需咸備罔缺大倍先業猶儉約自奉不厭粗糲其客至則鮮旨羅列極豐弗簡雖履盈戶外翔集浹日罕見倦容正德中徭賊犯南境邑令唐侯勲括民兵禦隘公發私廩具牛酒遠齎餉師以從人望侯大嘉之里中有急為之釋紛有不善諭之道策使帖帖無退言遇貧窘假之財穀不計其能償否為恠予逋不取盈負則毀券若途杠庵剝建治厚費弗愛其好象樂善類此嘗獨遵江濟失墜氷泮幾滅項無覺者鵝衣異人呼居民急拯温其僵以甦

索異人不可得君子謂公陰德所致不可測繇是為善益力扶孱紆困藥病懋
死衣食寒餒惓惓焉恒患不及又數年寓崇德之石門其所厚舉家人疫莫能
與公曰友當恤難闕其家藥之飲食之歸祗而恙遂為不起之疾矣特六月十
六日也距生天順庚辰七月廿六日享壽六十有一配孺人臨溪吳氏年三十
一而歿子男女各二續配栢墩吳氏子男一二吳孺人皆節儉服勤範壺佐內
男雲觀雲祈雲長世德競爽益大其家聲長女昭適金墜汪耀次女許聘山斗
俞衍迨請親迎以折狐且病愆期久之比一見謂可充家遂歸之孫男大珪大
珍大英大璋大璉大珣孫女笱弟俱幼衍每侍公受教諄切惜屬續之語不獲
預聞乃獲銘其墓獨無校乎

銘曰孤而能立積而能施謂善召祥晚福之宜嗟彼窮蹙胡道之迷豈嗇
其躬特豐其遺爰勒貞珉來裔之期

處士東山誌銘

古楓江載

嘉靖壬寅夏六月三日倫堂黃子文茂求為其父東山處士銘其墓予謂處士
猶康強無恙何墓之銘文茂曰陶潛自為祭文杜牧預撰墓誌家君意也幸勿

靳吾聞其昆弟五人而處士其次也名武字世勇性純朴而恬靜故當事而勇
為也則風飛雷勵事已而閑適也若太空之無雲雖不見其才美而所至有功
雖不見其營為而有得而無失是以自厥祖仕信君考義齊君以來世業已隆
至處士而益隆家門已盛至處士而益盛平居與昆弟怡怡子姓恂恂体若不
勝衣言若不出諸口允謂葛天無懷之民且厥配梅田江氏淑賢而尤勤於理
家子曰秀即文茂也能幹蠱象賢孫曰天生天產俱英異不九夫以處士之德
而子孫之賢若此人生分願俱已稱足則預銘其墓也固宜

銘曰人世機危羊腸進步若人素履平平皇路綠酒黃花清風林谷東山
之登憑高縱目遯而不汚身而不辱刊銘用彰使後人而知隱君子之墓

黃公樂溪壙誌

少峯張意

黃處士者世居新安倫堂早失怙岐嶷自樹亨匱裕窘篤親睦族侗儻不羈雖
怡情絲竹而不溺厥配程氏化於其德終不戾婦道側室姚氏生子鯉弱冠竟
卒嘉靖壬寅處士於所居東塋壽壙請少峰張子誌之以徒不朽且曰毋彌文
毋侈說毋誣已毋罔人少峰張子於處士有莫逆之舊不克辭乃曰夫誌其起

於中古乎聖人所以勵衰世而作之淳古者乎若孔親之誌吳季之題亘古而不磨者以其賢讓也若曹瞞之治命非無誌也而卒與草木同腐者以其鬼域也是故後之能如孔親吳季則孰不誌之使或有如曹瞞則雖誌之又焉為有無目今處士言之自樹惟傑亨裕惟能篤睦惟孝悌不羈惟通即其見諸事者可以觀行焉是亦孔親吳季之徒矣不文則實不侈則朴不誣罔則誠即其語於吾者可以觀心焉是豈曹瞞之可望者乎此則可誌之大者而况厥配之從善側配之媿羨此又二難之並得者也夫安得不誌乎遂為之題曰明處士黃公夫婦之壙公諱達字世通號樂溪生成化丁酉二月廿日

處士南岩誌銘

吳北松

南岩處士嘉靖丁未正月初十日卒以壬子二月奉窆於二十六都金塘山之原其子天生持狀屬予銘按狀處士諱廷琇字文茂別號南岩休之倫堂人諱義齋公者處士之祖也諱武公者處士之父也妣江氏處士自幼警敏慷慨負氣節性剛直不屈果敢有為處家庭雍睦而整肅接賓友直諒而不阿操履端慤持已方嚴見人之不善面折不容事之非義者直之不隱或以太厲規之

則曰人之為人磊々落落光明正大冥行葵隨口是心非非吾之所能也然不畏強禦亦不侮鰥寡故人之知畏而亦知敬雖承先業而志向遠大以為小成自安者非丈夫之志經營四方不憚險勦期以大拓家聲為念慨末世之偷不樂為時好風之靡者欲振之俗之漓者欲淳之雖動與時忤而識者知其為志意不凡也僑寓於吳好禮士夫而士君子亦樂為之相接曰南岩君直方君子也當於古人中求之相與泳南岩以彰厥志其見禮於君子有如此常誦古人年與時違意與歲去遂成枯落悲嘆窮廬之句志意愈勵躁急心熱竟以成疾卒年止五十有三人咸以處士之壽不滿德志弗竟償為惜焉初娶同閨金氏靜一端慈宜家室善內助莫不稱賢生子二人長曰天生次天產未週而金氏即卒年僅三十茲與處士合葬焉所謂百歲之後歸于其居昔歟繼室江氏予於處士同鄉相知最稔也同叙而銘之

銘曰不撓不污而端其趨不激不隨匪安以舒尚其志殆中行之獨復揆其行允直士之儔欤天嗇其年未究厥施嗚呼噫嘻其誰不悲

處士黃公文森壽藏誌銘

餘姚王華

處士姓黃氏諱應森字文森行英三十一世居新安休寧之古林其先黃帝陸終之後受封于黃子孫以國為氏春秋時楚相欽門客甚盛至漢則丞相霸輩皆有名位於時晉之世有曰元集公者由安陸守新安因家焉郡之有黃氏自此始十五世孫儀仕唐為祁門縣尉居祁之左田其孫思敏遷休寧古林傳至崇一府君是為處士高祖曾祖諱賢字子敬祖諱神奴字德申有孝友之行春坊司直蒙峯汪先生為著孝友傳以傳之父庭芳邁往不羈放浪江湖間嘗自儼於天隨子娶鴈塘吳氏生四子長應元八應威次處士季蔓衍處士謙和簡靜入則孝於親出則信於友宗族鄉閭無不踈皆飲其和早年客遊吳越矻矻孜孜惟勤惟儉暨乎晚歲先業益恢而足以裕後昆於是綸中野服優游桑梓之墟雖郡邑亦罕足至焉配鴈塘吳氏亦賢淑婦道母儀有足觀者生子男五一陽柱陽華陽菊陽春陽女二長適山斗程鳳次適孫田程松孫男女各三人處士生於永樂丁酉十二月二十三日吳氏於處士少六歲蓋生於永樂癸卯七月二十六日沒於成化甲午八月二日也繼娶劉氏無出元是處士既葬其配於邑之李克源遂慨然自為終焉之計乃營壽穴於其源相距若干步亦趙

卯卿姚元之司空圖之遺意也穴既成復俾其族弟莆詳書世系并其平生行實如右走書京師因其鄉人進士汪君守貞求予誌其事而為之銘予惟禮有之曰六十歲制七十時制八十月制九十日脩歲制謂棺槨之不易成者先王之世幼有所長老有所終此養生送死所以俱無憾也後世教化不明人心迷惑年踰耄耄而諱言終事卒然罹不虞之變則斂不蔽形而窆無處所其不為烏鳶螻蟻之食者幾希今處士當歲制之期而預為寢居之穴非其委形骸於天地悟死生如晝夜而不以脩短為戚欣者疇克爾耶須與趙姚司空之儔並稱於後先可也為之銘曰

黃氏之先蓋出軒轅歌為楚相珠履填門次公神明維漢之翰元集仕晉乃家新安定居古林自思敏始二十一世是為處士外信于友內諧于親儉勤營構以貽後人既歲善配爰及已謀建其宅兆異穴同丘厥壤惟吉厥德惟馨宜臻遐考於千百齡

林泉黃公一陽墓誌銘

桐灣程恭

林泉黃公棺而窆者四十有一年聞孫琢屢書拜予其言曰先人之行非鄉達

莫之悉傳世之言非信人莫足徵先幽之寄先生有賴焉予喜且惧益見其有後而愧予無以副也公諱一陽字思復世居休南之古林按來狀黃之先黃帝六世孫陸終後春秋時為黃國逮漢魏郡太守香以孝行望江夏晉永昌間曰元集者守新安子孫因家焉傳十五世孫儀仕唐為閭門尉遂家左田儀子益謙生子敏遷休寧古林歷十九世神奴是為公會祖父也祖庭芳考文森凡三世具有隱德高行見華名筆光昭後來公甫髫髻使能脫去群兒態迨成童便能自樹而曰為人冢嗣親老而諸弟幼生理或謬先業孰培門戶或陪咎將安歸持服勤於醴畝則手足不勝其胼胝抑矢心於仕進則性資未脫於凡近不承權輿為世所嗤我儀圖之役志於商不亦可乎遂挈囊橐戒童僕造膝稟命以行望湖州市而止曰此可以居吾業也坐賈區販材木動如筭計既而以往來衝道公私泛擾為嫌復擇處於德清南倉借妹壻程以鳳締腹心而貽孫謀焉時

憲廟辛卯歲也後二十有四年為弘治乙卯故廬大公刻苦而聿新之循序有節殊無歎速盡羨之累蓋得衛荆之家法者也又十年乙丑邑舉公為萬石長

凡三載心勞而法不廢賦平而民不病一邑舉稱長者公為人神清貌古言溫而氣和孝奉二親友于諸弟治家有法教子有方遇婢僕有道以雍睦聯宗族以恩禮屬戚里偽言未嘗出諸口偽行未嘗措諸躬見之者起敬聞之者愛慕此其大槩也若夫隱逸風致泉石趣味則兩溪駱公表白於墓門者悉矣公生正統癸亥十一月六日歿於正德丙子六月二十有四日凡歷春秋七十有四配孺人吳氏先公十年卒丈夫子二曰隣曰助孫男八珽珽隣子玳環珮玳璫助子女三時適鴈塘吳大玉適會里程復興珍適清漪姚餘相諸子若孫以公卒之年臘月二十日丙寅扶公之柩卜葬於二十四都之西岬與吳孺人同穴琢以地遠歲久不可無誌以貽後為請故為之銘焉

銘曰

新安著姓江夏裔餘林泉適意與天為徒形扁稿壤氣還太虛岩岩西岸億載其居

處士黃公桂陽夫婦合葬墓誌銘

寒泉潘旦

處士黃公暨配金孺人歿子天佐天贊持汪太史狀侂汪友仲蘇過余乞銘余曰不虛不隱太史文足徵也按而叙之公諱桂陽字思馨行清五十三其先有

諱元集者晉新安太守遂家黃墩是為新安之始祖傳至唐元和尉初門家初之左田孫思敏徙休之古林是為古林之遷祖又十九傳至德申為鄉之聞人汪蓉峯先生為之立傳公曾祖也祖諱庭芳性倜儻自號天隨子父諱應森隱德弗耀母吳夢植桂抱日生公因名桂陽紀夢也兒時岐嶷及長籌略過人娶倫堂金仕洪公女是為金孺人以賢淑聞公既得賢配委之內政而自浪迹江湖初僑寓杭繼遷湖之德清遂稱為良賈湖人侈而少歲官連告乏公貸之不急其償憲副談君時英侍御蔡君信之樂與之交祠部程君崧亟稱之曰孰謂思馨賈人哉公偶市一芳鮮必馳遺孺人手割烹以奉親親安並以壽終殿撰王公華為誌其墓君子謂公之孝養以孺人為之相也故廬厄回祿興復如初里有訟者輕貨解之族之貧者食之構明遠樓擇秀異者延師教之學士篁墩程公為記都憲靜軒汪公美之以詩構室西廡德清庾雙溪也又構招賢樓公謂孺人曰堂構並興得無勞主饋乎曰願君澤物親賢忘其勞矣事允仲陽公如父撫弟華陽菊陽春陽曲盡友于孺人曰君善昆弟吾諧妯娌其庶幾乎正德戊辰九月初十日公以疾卒距生于正德己巳花甲蓋一週矣孺人哀毀踰

禮勤苦自持飭諸子力善以拓先業真女流丈夫也嘉靖甲申十二月初六日歿其生也先公一載歿後十有七載云子三綽有父風孟天相授九品散官先卒娶吳仲天佐娶吳季天贊娶胡繼程文一適鴈溪吳秘孫男十一琴進週遷避遂遜遙迎遺逞女六長聘五城詹惟端次聘婺源汪偁次聘歙邑柯實餘幼曾孫男一曰榜女一卜以嘉靖乙酉十一月初十日扶柩合葬于里之胡家塘祖塋之左亥向嗚呼公暨孺人叙倫悌族輕財樂予合德齊壽子孫維蕃可謂作善降祥存順殄寧者矣不可無銘上曰

磊上黃公江湖性氣孝友自天蓄施惟義肯堂肯構明遠延師篁墩有文靜軒有詩姣考賢配君子比德婦道母儀閨壺典則胡家之塘連壁歸藏勒茲珉石永矢弗忘

處士黃公隣夫婦合葬墓誌銘

明山姚洙

世之論者類以遂末抑商謂其殖厚而德涼也余獨以為商之在他方者則然惟徽異是夫徽君邑也至孫吳時猶謂之山越田少無以給耕者而齒日蕃於是遊於湖海轉而貿粟以生非其業為商也

出烏以禮治其家以詩書淑其子孫商也奚病故休寧古林有南屏黃處士者
余嘗聞其人未之見也嘉靖己亥處士之季子璉謁余而請曰先君某嘗辱交
於縉紳先生今亡矣璉也深惟先德不可終泯嘗念先世德申甫春坊汪公為
之傳應森甫太史王公為之誌先君無忝於祖葬而銘之非先生不可乃持憲
副汪君狀徵又於余憲副君秉直弗諧於朝其弗阿于鄉也審矣余於是益信
處士之可與銘也黃自晉新安守元集公以來世系甚遠處士之四世祖即德
申甫傳為庭芳甫繼則應森甫應森甫生仲陽甫號林泉逸人南屏處士其長
也處士諱隣字宗德生而慈諒通書史大義自幼能事王父母暨父母承望顏
色不少忤其意胥稱之曰是善事我年十四仲陽甫攜之茗雪間居貨若干處
士從其長者游耻以貲自雄貧者貸于處士不責其蓋償往上焚券濟人德清
簿領征歲租責民愆期貸于諸商莫有應者處士奮然曰官無入則民危困吾
不忍坐視其急傾囊助之民至有感德泣下者嘗長所居區賦民不能供處士
復代之輸處士既數以此振施而資日益豐仲陽甫每語客曰吾有子能以善
事親吾無憂矣仲陽甫置側室有子處士夫婦每曲庇之九處士所自營者與

庶弟均焉其群從各擇便利地以居處士不以介意構樓於側曰以此奉親足
矣群從有愧色自仲陽甫捐館處士曰吾獲事親之終且為人父其可不知返
耶遂菟裘於家命其三子曰爾珏爾琢爾璵爾璉則惟文學是種是蹟是則
可畢餘年矣間又進三子訓之曰勤與儉無侈爾度詩與禮無薄爾祚佩是則
吾子也三子果承志無或殞墜處士喜人讀書儒而饗者時荷其貺平生不言
人過樂道人之善雖寸長不遺遇訟者每委曲諭之多以處士之言而息鄉黨
有鬻舊產者處士曰此君先世所遺柰何棄之或強售於處士處士必倍酬所
值即此數事君子之存心不是過矣所謂賢而隱於商者非和處士年六十五
憶德清別業扁舟往遊三子者侍處士曰此吾所締造者汝輩宜析而居之琢
進曰吾父豈以諸子有異慮邪父以義方訓子孰敢犯貨財妻子之戒和處士
悅曰審爾吾何戚於死已而返故鄉復五年而卒春秋七十愛處士者不知其
老而恒以失處士為悲處士之元配為倫堂金氏女諱史父永興生史心竒愛
之思覓一快婿處士之卜協吉乃以歸之史始為黃氏婦九處士所欲志必與
合承上字下內外無間言其姑夢一老人持紫竹三根畀之曰汝栽是竹必以

子孫千億是祝姑以告其婦咸曰此多男祥也於是姑與婦謀各置貳已者以廣其嗣續處士曰有是哉婦不妬吾之助也乃納妾潘氏弘治己未血抱子珏明年庚申元子琢生則金出也珏與琢所以敬其叔與處士之均產於少弟者金之力居多正德丙子潘生季子璉金視其庶子不啻已出其為黃氏母又有足稱者先處士卒六橋徐君為之傳載其事甚備處士三子珏娶星洲葉氏琢娶五城詹氏璉娶鴈塘吳氏女二坤適山斗程毓免適會里程海孫男四曰槐曰梓曰木曰梁孫女一貴己亥年十二月初十日卜葬于里之蛇山之陽己山支向金孺人祔焉繫之以銘曰

迹也湖海心也詩書匪積而施其實也儲嗣者弗殞將食馱餘式弘爾後以貢其初

處士黃公助夫婦合葬墓誌銘

李春芳

處士後村黃公既歿之二年辛亥予師太史駱西谿公以書示春芳曰處士黃君後村徽之休陽古林人也今即世矣其子珏於予有一日之雅稔聞其行誼而為之狀矣茲欲乞銘以垂有未知愛我者莫如君也數懇為之徵焉奉推愛

寵錫之無讓夫銘所以昭德於不朽亦可以觀仁孝用心之所存春芳雖未接處士之顏未聆其言然因太史公可以知其子因其子可以知處士矣誼其可默按狀處士姓黃諱助字宗輔別號後村生而敏慧色溫而莊言簡而當與人易親而不狎律已有度而不亢鄉之人咸傾心焉其客吳越間也吳越人易樂與之游曰後村之業商也心醇而行惇蓋儒者也自幼好讀書知大義諸星曆卜筮之說靡不究心而尤精於醫雖不專其業罔不應手愈也少孤事其兄南屏君甚謹南屏君亦深友愛白首無間言舊居燬於回祿乃即其居之北原殫力構建因自號為後村迎其兄同居之時屆五旬之初度親故其觴豆擬為稱壽乃憮然却之曰古人生日不為樂殆非矯也蓋其至情感念不可遏耳今獨敢當此哉嘉靖甲辰乙巳歲比不登鄉人困餒多死徙處士罄其所有賑之全活甚衆懷其德者至今頌之不衰性喜閑適所居多蒔花木鑿池構堂暇則徘徊其中客有過者輒延歛爐熏茗碗輒躡語笑終日而未嘗倦也庚戌之歲五月而疾作顧其子珏曰人之修短莫逃乎數近自知有兆殆弗能起矣醫藥無以為也惟以爾兄弟居業未有定所為念耳珏等泣曰大人之疾亟矣兒輩願

以身代之弗能違恤其他曰若是吾何患耶即正襟危坐不復言既而目諸問疾者若示辭謝意須臾目遂瞑夫世之業商者研心計於錙銖推便利於斯頃役役塵容殊無隙暇處士標迹世流因心自遠綽然籛邈之風高振一時非所謂大隱者哉故能卓立而不群順養而不違考終而不亂足以勵競激貪而古林山川亦為增邑處士生於弘治乙未十二月十四日卒于嘉靖庚戌九月二日享年五十有二曾祖諱庭芳祖諱應森咸有鄉行父諱一陽號林泉清隱翁履道迪象譽望益著處士乃其季子也前配姚氏貞淑勤婉姻族稱賢先處士二十年卒繼娶吳氏金氏亦相繼先卒子男五人曰玳環珮珣璫女一適金一謨孫男鳴文鳴兆鳴震鳴岐鳴春鳴康鳴安女三以庚戌年十有二月一日玳等塋處士于上塘山之原銘曰

偉哉處士美質有聞禮義為膏以自灌薰始刊其璞終渙其群風雅高騫譽望四芬琴傳鳳德劍拭龍紋蒼蒼喬木鬱鬱華門沮溺之儔築室後村百花明簾獨鶴司閭親友談交茗碗匏樽有道風儀太丘德貫軒籀清迹龜跌玄墳積厚流光允徵斯文

終

新安左田黃氏正宗譜卷五

墓表類

元

忠節元承公墓表

按新安郡志黃元承字子厚婺源橫槎人以蔭累遷丹陽令所至以廉稱後遇賊不屈而死謚忠節據家乘忠節公名志遠別號庭春子曾祖諱有明居里之晴村有隱德祖諱從龍父諱雷奮皆未仕公以元進士吉水野舟黃彥惟中公來知婺州事多惠政為民請留遂家婺無子時雷奮為州約正以同姓故受知於侯携公謁之姿表峻異動止如成人侯奇之指所居之庭試之曰聞汝善對偶辟間少一春聯汝第為我思之公良久題曰門庭非尚顯地位本來高侯益奇之遂竟為嗣更名元承而教訓日嚴既長蔭及之公懼弗類強學力行不息父子之間慈孝天至侯以壽考終公哀戚踰禮罄其貲以供喪事卜塋邑之湯村丹陽令凡蒞官甘約之一毫不妄得常俸不能給輒令家人鬻產以繼之知丹陽時招延鄉人王伯脩教授諸子王常借書於民公見而怪之曰昔人以借

書招餽金之謗獨不聞乎亟召而返之且悵然不樂者累日其自守類如此故
所至累蒙燕能之旌後賊寇丹陽公率吏民奮力以戰力不繼仰天哭曰城池
不保非忠歐不教之民以戰不仁吾有死而已城陷賊忿不即下殛其首罵聲
不絕而斃府以聞勅褒忠節禮送骸骨歸葬晴村基壯庚向

國初樹祀鄉賢祠後胡邑侯作新祠歛鄉賢之家以助所費我族未應遂遺其
名惜哉予因郡邑之紀質以父老之傳特表而出之以俟後之崇節義者

大明

一里公墓表

胡雪屋

一里公者諱追字祖榮黃其氏婺源黃江里之橫槎人其生平足跡不識城市
縵遠出亦不出里域之外或曰古者男子有生必懸弧以示志於四方公何志
於一里哉一里公曰吾居則讀架上之書出則耕隴上之雲餘無外慕何志於
遠然世人甚有不自量者營貨利於數千里之外歷幾霜而後返返則貨利或
有過於不出里域者有不及者有喪其父母之賞與殞厥身而不復返者且其
不出里域者而貨利亦有過於遠索者亦有不及者亦有甚而致於貧賤者甚

而致於貧賤與其遠索大得貨利要之猶不失其妻子之樂吾有感焉故無外
慕自是鄉人聞其所往不出一里因而賢之呼為一里公一里公既歿之三十
有九年其猶子曰遲者抹雲川王秋官兄所為行實來告曰吾仲父一里公有
質而無文有德而無言有仁而無後其將不泯泯焉與草木同朽腐也不肖惻
惻痛恨思無以暴於來世徒有是心而莫有是力幸而與先生有塞脩之盟今
先生又能以文辭鳴不惜一言將不暴潛德於幽光乎予聞其言始復記憶當
一里公歿日予僅九齡先一年為予訂婚盟於溪東茂寧黃公之仲女至是予
以白草素衣哭於喪側時吊客滿堂慟聲如雷弔罷者莫不垂涕頌其行義因
而聞其事父母盡孝父母歿移事父母之道事伯氏移事伯氏之道友弟姪伯
氏貧里巷招以酒食貧不能報一里公設席酬之喜賓客客至無論識不識必
盡懽心族有棄祖墓者一里公出金為贖之孤女不能嫁者助以嫁之猶子不
能娶者滋以娶之迨其年老財竭又無子男可以代職貨食不足猶拳拳為諸
猶子開拓門地或曰自弔之不暇何恤之有一里公曰能生為凍餒死無殯殮
不能忍門地之不振也竟以貧儉終其身歿之日衣無為歛粟無為喪而祖業

門地無一毫所失嗚呼常人貴遠賤近向聲背實貧賤溺於饑寒富貴流於逸樂其所務者皆目前之榮無後世之功如其窘其嗣絕則傾橐覆室以奉其生者有之不足繼竊旁支異產以供其用者有之如此者又非一里公之罪人者乎一里公生正統丁巳六月十有九日歿弘治癸亥正月十有九日配朱氏克順厥志並葬白菓樹園南向嘗謂聲聞過情君子耻之于於一里公者可謂無媿者矣表其情實勒於堅砮非惟永其族之人之弗忘抑亦起吾鄉之人之景仰云耳

處士林泉黃公一陽墓表

武康駱文盛

有隱君子曰林泉黃翁者新安之休陽人也新安多故族休陽黃姓為尤著蓋自新安太守諱元集者始家新安厥後代有聞人更十九世居休陽古林曰文祖者寔翁之十九世祖也會太父諱神祖諱庭芳父諱應森咸有鄉行翁生有異質數歲知孝敬稍長勵志問學嘗習舉子業擅能名既而心忽厭之乃挾冊遊江湖寄于商以自適然其儀度則恂恂儒者也未幾復嘆曰為用是瑣瑣者為哉遂浩然言旋卧林泉之下扁其居曰林泉清隱蓋將優游以卒歲云翁嘗

有言士君子會昌辰遺明辟展厥蘊持以弼成至治俾澤流一時而業垂千百世不替寧非人情之所深慕然有命焉孰得而強之輕世肆志野遁山棲水石之與隣禽魚之與儔茹芝南岩舒嘯東臯視世間一切榮利不啻為雞之於腐鼠然此其孤踪子履又非庸流所可測識予敢自附于若人之徒哉顧人之才性有能有不能予惟安厥素履於林泉間為太平為閒氓庶幾不失此生耳何暇外慕以自取顛頓耳嗚呼翁之言若是可以知翁之所存矣翁平生樂施予重然諾親賢樂善睦族厚隣醇德偉行卓卓在人耳目者不眇然其心之所自得與人之所以重翁如芳洲張公篁墩程公端峯邵公咸為之詠歌厥嫩願獨在此而不在彼也則所謂林泉清隱翁真無忝於斯名矣夫翁諱一陽字思復年七十有四以壽終配吳氏名家女克閑婦道子男二曰隣曰助孫男八曰珏隣抱子曰琢曰璉成隣出曰玳曰環曰珮曰玗曰璫成助出隣號南屏助號後村各守儒業琢尤有孝行璉玳亦稟羨質喜文學翁之令德克昌厥後此固足徵之矣翁既沒四十年餘璉玳時從予遊因請予言樹碑于墓左予心慕翁之高致而弗能踵其遐躅也固樂為之有述迺其歷履之詳具于壙志者茲可畧

云

處士萬謨公墓表

茗山吳子玉

予邑有黃玄旺氏者介王汝臯氏來予請曰先君歿今三十餘年矣歲戊申已塋於高克源之東木已拱矣缺然未有表其墓也不肖之罪大乎每用痛心疾首恐卒湮沒無聞於後之人及今思以表之敢丐一言於後吳子玉曰唯唯若之請可以觀孝矣孝難於思思難於永父歿之久猶不忘表其墓可以觀永矣按汝臯氏狀處士姓黃氏諱雲法字萬謨休寧高源人也年髫時喪父執喪哀戚若成人族人異之性喜學大父母以孤孀故弗遣之學使理家政顧事事當大父母意事母氏顧事事當母氏意大父母喜曰有孫如是吾子如為不亡矣處士跌宕慕羨急於公道苟所自喜能揮金錢不顧惜念先世以勲業著赫不可無祠宇乃捐已田為祠址率族人為宗祠歲時伏臘會食後母氏歿有二女第待年於家處士盡以妻資遣嫁之凡處家外能重象輕費類如是治裝南遊吳越吳越士大夫莫不樂與交驩後以倦遊歸歸無何即歿矣年僅三十二也處士生於弘治丙辰六月十五日歿嘉靖丁亥七月十六日配涪溪程氏行象

著於中表子男三人玄旺玄昶玄皓處士歿時皓亦繼鵬惟伯仲邈焉俱幼今能砥樹世其家矣玄旺配北門蘇氏玄昶配坑口孫氏孫男六人應幾應熊應明應驥應魁應芳婚聘皆名族女一適邑市玉堂王淵王汝臯氏即其外孫也吳子玉曰以處士闊達之志將大有施設於時乃以壯年歿家人伶俜偏孤亦荼毒之極矣是時也豈知其後之能砥樹哉乃今三十餘年鄉人能道處士之行疊疊無遺而處士之配能矢志持窮以無傷亡者名君子與孫俱奮起不墜其家家政如其尚存死者可生亦可以無憾哉世有老壽設百計以貽後然當暮日有目擊其子孫速鬻而致郵者有身歿未寒而即壞其家聲者又何貴於壽哉使彼我異觀豈以彼而易此哉新安左田黃氏正宗譜卷之五終

新安左田黃氏正宗譜卷六

贊類

晉

太守黃公積像贊

出塵之表絕俗之英節以持已虛以受人昂霄聳壑鳳舞龍騰吟風弄月玉振金聲不遷百世垂梓黃墩

銀青光祿大夫檢校工部尚書兼御史大夫上柱國鄭延光拜書

又

郡源江夏冑綴神明忻逢典午昇鎮專城首出賢良之傳重持清白之聲練屏大好均被其榮

右諫議大夫判吏部讞泌書

又

形容儼然瞻者起敬氣象從容誰探其蘊不吐不茹有嚴有威千古之下令人步趨

廣南西路安撫竹州吳倣拜書

又

溝洫盡力庠序聿興尊賢養老允謂廉能宜爾孫子百代雲仍

護軍都尉黃公原奕像贊

維君天賦雄虎威資載橐弓矢統國之師一旦捐生殞于賊刃身殲名存令人瞻敬

賜狀元及第梅溪王十朋書

又

壯期吞海豪氣凌雲學有淵源經邦濟世才韻梁棟絕倫超羣

又

厥貌惟莊厥行惟匡厥志彌光厥德彌香顛顛昂昂如圭如璋一時死難千載流芳

龍圖閣學士休寧會里程大昌書

唐

御史中丞上柱國黃公德海像贊

胸藏翰畧學究天人有言必中無理不明典周輔漢非熊非鱗身冠烏府有執有遵於先生之老成

賜狀元及第銀青光祿大夫國子祭酒呂蒙正書

又

才奇天下行著臺端羣邪震伏百後騰懼蜚聲奕奕鳳舞飛鸞

衛郡岳飛謹書

禮部侍郎黃公宗器像贊

文章典嚴才識天成早登科甲晚掌銓衡

吏部左侍郎黃公損像贊

光明正大天生自然尊嚴敦厚誰或能先出類拔萃合聖與賢

龍圖閣大學士吏部尚書呈於羅汝楫謹書

又

文章山斗為國喉舌奮庸臣鄰一時之傑天子是依宅茲宰揆無忝厥位百

僚師師

賜狀元及第宜興張九成頓首拜書

又

博覽羣經仰承列聖卓冠先儒開啓後進喬嶽泰山金聲玉振

文山文天祥謹書

又

職居總宰統攝百官屏除姦慝引拔孤寒垂紳正笏竚立朝端

縣尉儀公像贊

天挺英資出宰百里上應列宿肅清如水綏寧兆民敷政優優不兢不求百
祿是道

觀文殿大學士程元鳳拜書

又

清忠夙成文章天性連典三邑播茲德政瓜瓞繩繩典則是程音容儼然留
傳于今

賜狀元及第秘閣校理舒雅書

又

雖居郎官列應上宿公直清廉德無瑕垢忠于天子惠及黎元簡冊所載令
聞弗湮

吏部侍郎恕齋汪綱書

又

性天廣大心地恢平宜爾孫子奕奕仍仍

秘書省正字公益遜像贊

直樹挺扶桑兮景維莊直櫛鷹錦帆兮艦大萍直躬者播清風兮端玉堂直
心者奉天徽兮裊墨香

孝隱黃先生和像贊

左史呂午

曠探義文學師孔孟存通於天曰嚴與敬溢求廢於苦廬滅性超絕古今冠
冕百行

梁

開府儀同三司公叔宏像贊

桐廬陳禧

公眸如炬公髯如戟滿腹甲兵虓虎辟易桓桓將軍殲彼夷賊大君是嘉開府赫奕神劔倚天威芒猶昔懋哉後人元勳有繹

宋

禮部尚書黃公何像贊

大原王璉

堂堂乎表其容頽昂昂乎正其衣冠作 皇家之宰輔福黎庶如立山噫公之良公之德垂芳名於翰苑炯炯而不磨也歟

議郎黃公天衢像贊

秋崖方岳

恢恢乎望第之宵躋躋乎道學之脩上則以道康其世下則以身勤其官蒼黎轉展若已推之災旱存至若已失之在在異政後人誦之濟濟茂材貞人輔之宜皇上之優渥而下民載之如父母也與

特奏名黃公昂像贊

公其龍耶盍天下澤公非鳳耶瑞誰為大 呈才奏名斯特依希臯夔賢未章德猗於後昆孝思維則

翰林院學士通奉大夫知

制誥玉牒官兼 侍讀程秘書

掌書黃公商伯像贊

維山嗟嗟維水漪漪春山迤麗秋水清澌公也孝以事親義以賑族地靈人傑人顯境輝比山更巍比水更瀾

通奉大夫右丞相兼樞密使兼提舉編修

玉牒 程元鳳書

十三朝議黃公思明像贊

古逸汪炎泉

先嶽孕秀篤生斯人其氣浩浩其容申申丕承忠孝超類絕倫明體致用不愧縉紳書香垂統簪纓繩繩即夫憲憲之令德宜其奕葉之秦秦也歟

從事郎錄事黃公遇龍像贊

栢梧馬廷騫

瞻厥貌君子雍雍訊厥人文章龍龍可以黼黻皇猷可以勒銘鼎鍾始軻翰林芬滿蒼隆此固盛美之養養而為後人之起敬也歟

工部尚書瑛公贊

閱苑芬芬錦綉翬天生英秀露華浴凡世塵埃飛不到薰蒸日月有黃公

進士黃公公選像贊

井亭汪文高

英采趨趨奎星焜焜遲攀芳桂夙譽文章雖悼逝蚤促文玉堂

慶士黃公顯卿像贊

玉溪吳觀萬

幹蠱有餘而燕貽厚壯趾無厲而里閭鈔修明譜牒而皇祖多祐交契金蘭而英誼同心宛然如在之未朽其寧不為百世可祀而莫沉者歟

婺源州儒學學正黃公立像贊

其貌莊其行方卓爾為汝南之龍首藹然播實氏之桂芳尊姐雍容笑傲林泉之適衣冠淳古從容禮法之場欲知傳世之筵瞻叢林之鬱茂試考遺澤之遠視奕葉之蕃昌祖武之繩比充有力景行之志我亦難忘勉為贊詞殊未得其彷彿慕其人物禮儀之感懷不行升君子之堂也耶

賜進士奉議大夫雲南按察司僉事崑山村周愚書

澗泉慶士黃君智像贊

伴竹陳鑿

貌古神情端表正孝悌忠誠根于天性敦尚真淳靡事奔競讀其睦鄉條訓之規驗之非以矯世跡其居鄉善俗之德推之可以為政於戲斯人也其張公藝之徒歟抑王彥芳之同徑也耶

日新齋諭黃先生亨像贊

隆隱朱升

惟公之德問氣篤生金精玉粹周思孔情立言垂訓羽翼六經宗王斯文齋諭有聲百世之下聞者起刑

大明

慶士黃公維天像贊

篁墩程敏政

有古人心術有儒者氣象有世族家風有聘君德望惜未從其人於几杖之間徒想其形於丹青之上也

又

三山林瀚

其容肅肅其氣英英心之存樂善齋之扁嚮明撫雲松以閱世醉經史以陶情噫斯人也其獨抱夫珪璋之德器而不忝夫詩禮之家聲也歟

慶士應森像贊

其氣也和其心也平其行也端其量也宏其衣冠也雅而肅其學識也通而明其為人也如此所以其生也壽富康寧其歿也子孫京昌而獲全福之名賜進士中憲大夫雲南按察司副使奉
敕提督屯種前河南道監察御史婺源汪舜民書

又

賓山居士鏞英

喬出帝胄歷歲百千書香所染世不乏賢惟公所稟度幾乎全壯維四方飄飄馬遷其質格矣其容肅然子孫是式永保乎傳此善繼裕乎後先者歟

東山逸老寶像贊

程昌

動靜有則言語有章行貞而確性柔而剛心豫以遠德謙而光我冠博帶無市井塵俗高視闊步有湖海行藏生斯世也為斯人也積久之訟仗翁繩削而靖息憑陵之氣望翁閭里而安詳法立於家庭也嚴整惠沾乎鄉黨也汪洋是其積於中者既厚故其發於外者彌昌求之古人風範神采蓋亦不減乎王彥方噫所謂沒而可祭於社者其翁耶

慶士桂陽像贊

東峰汪玄錫

其氣之溫如美王之加飾也其行之恒如四時之不忒也早歷辛苦而人固莫之能欺晚至富饒而已亦未嘗自恃行足為宗鄰之儀刑言足決鄉人之曲直是宜其門望之巍巍而子孫之秩秩也歟

慶士可園黃公天佑像贊

茹松商大略

嗚呼此耄耋黃公像也所宅者夷所履者素迪人之紀循天之故自少而老無厭無數自家而鄉可儀可度思不出位而行必由戶坦坦永貞獨寐獨寤茲宜其凝休于天而錫胤錫祚也夫

慶士克明公像贊

一鏡山李汛

呱呱誰乳幸有維母通融諸兄能茹荼苦陰德里中良方肘後惟動則設惟儉乃有而况內人以賢為助此所以脫貌之頎然而覲之者仰而慕也歟

石崖翁弟小像贊

鄉進士方若坤

貌古而樸容肅而莊眉如綴雪顏如渥丹惟君蓄德而斯沃光覲君匪斯測其中藏心田瓦瓦春盈其腔唐舉占之子孫茂昌而君為誰此濟嬰黃翁小像也

處士雲山志賢像贊

邑人吳郁

贊曰明公匪私割斷惟貞才稟通達德全粹精少失爾怙撫育由兄慕效于曠世之幽士風動乎鄉邦之時英

處士練川宗振像贊

方山黃福

贊曰慎爾樞機謹爾威儀安分有守俟命無為德積厥躬也既淳龐而單厚福乘後昆也必戩穀而罄宜

處士萬光像贊

餘姚陳南金

衆方用智公乃率易衆方趨利公乃教子惟其率易是謂大智惟其教子是謂大利此其所以不求異於人而自異也歟

南屏黃先生隣像贊

休哉居士都重賞以厚生兮所願惟貞樂善施以正德兮厥道惟澄紀其奮義而紓民推之可以託國原其惇倫而撫弟性之非以下名故縉紳有識僉謂其秉仁而莫禮而顛危無怙者孰不感其植仆而扶傾也耶

賜進士及第翰林院 國史編脩文林郎侍 經筵展書官慈溪元峰袁煥書

黃公元佐像贊 檀壘

温乎其容浩然其氣不伎不求隱居行義勤儉律身家興業立乃積乃倉有名有實時人効之而不能後人思之而弗及也耶

漆園行樂圖贊

都峯周怡

魏野有樹鶴舞琴鳴藁缺有壠婦饋夫耕敬宗收族崇禔是膺念祖上祀周禮乃行子孫其昌荀聚德星山水爾游月旦可評斯人也其君子大雅之徒歟

登仕即鶴軒黃公天相像贊

生高節奇行之鄉而迹不求異際文恬武熙之世而心不苟同其貌也古其識也陸其居家也有長者之德其餉邊也有義士之風章服之榮匪宦而宦畎畝之樂匪農而農友軒中之靈鶴慕網外之溟鴻是蓋生涯自足而俗慮皆空者耶

賜進士出身嘉議大夫浙江按察司使郡人唐澤書

處士任信公像贊

瞻彼神彩方眸炯然觀彼衣冠歸坐斬然惺惺其心恬如無訟卓卓其子允
矣象賢山林之散士陸地之行仙松菊以供分內之樂詩酒以陶性中之天
噫若茲人也庶幾乎龐德之逸駕其亦與梁伯鸞之齊轡歟

處士文贈公像贊

恢乎氣宇肅乎儀形游心古訓為政家庭士林之秀里黨之平未厭者壽不沒
者名

處士文茂公像贊

覺山

儀容典雅志行超卓才善繼承言無宿諾壯遊江湖老休林壑聖世逸民明哲
先覺

處士景功公像贊

胡炳

貌端而嚴行直而万淵然之識浩然之剛臨財利而克讓恤孤幼而如傷解紛
爭其迎刃處盤錯如探囊意玉韞石而山輝木潤斯人之晦迹乎山林也固宜
表正乎一鄉

處士萬靜公像贊

外姪俞曰丞

觀姿貌之魁碩而不知所養之腴即率履之坦夷而識所存之直詩禮足振其家
聲江湖聿紆其胸臆勇退市廛恬甘泉石播清高隱君之風著忠厚長者之德
寄興觴談陶情藝植非望之獲世競而已獨徐徐惟善之圖身老而心猶惻
介景福於鶴齡遺大安而燕翼若公者豈不足以挽世道於淳龐而為宗姻之
矜式乎

處士萬福公像贊

俞同人

始生失恃幼學強記貌龐儒之貌志古人之志恒謹密而自持不矜眩以為智
其燕居也凝然若有思其中立也卓然而不倚克敦孝友之風樂行仁義之事
治家猶勤篤親獨至聞望之高雅重於鄉評紀述之詳庶幾乎野史舉案有媿
德之賢克家有幹蠱之嗣壽躋耆齡強逾壯士即其德善之必酬策其福慶之
無已

處士萬植公像贊

俞同人

像表肅壯襟懷光霽聿作勤而勇進修託畊逸而緇經濟其直道而行也希蹤
古人其茂業之拓也繼志先世胡於俗而寡諧期於理之是契超出風塵等徂

林之孤松森立庭階婉蕪山之五桂象方之教尤嚴樂善之心無替是宜享盛福於昇平播芳名而洋溢也

壽官伯秀公像贊

癯然老翁凜然高風弗倚於立罔詭於從達觀湖海之表濶步溪山之中享田園之清福獲年壽之榮封歛用世之心即一家而施於有政大義方之訓教三子而起於豪雄既辛勤以為業亦恭儉之是崇斯人也其黃氏之祖伯秀之公而有此耿耿之衷于子之容也

忠烈黃公瀾伯贊

少保尹公

烈烈侍中學有師承春元殿魁陞武春卿國步斯棘奉命徵兵兵未入接世已變更自度厥偶志節剛貞痛哭江上招魂以盟惟妻與女果不苟生遽率十口投死淮清身隨家殞上友屈平貞節烈義今古同稱孰紀其事而匿其文其文則匿其名則馨

新安左田黃氏正宗譜卷七

誥勅類 付表牒劄付

護軍都尉黃原奕 勅命

奉

天承運 皇帝制曰昔者之治天下也必資威武以安黔黎未嘗專修文而不演武朕特倣古制設武職以禦治功受斯任者必忠以立身仁以撫衆智以察微防奸禦侮機無暇時能此則榮及前人福延後嗣而身家永昌矣敬之勿怠

大元二年九月初七日

黃原奕年三十歲新安姚家墩人升平元年中武舉隆和元年與趙人戰有功陞護軍尉寧康三年隨

駕奉

天征討大獲全勝拜護軍都尉本身字昌世祖父積大典三年拜新安太守祖

母張氏封安人父尋贈都尉母鄭氏贈安人妻晉氏封安人

護軍都尉黃原奕 勅命

皇帝勅諭護軍都尉黃原奕

今者虜寇大半入關臨逼京師甚急勅至爾即連夜挑選精兵健馬一萬五千員名各帶盛甲弓箭令張錡黃原奕親自統率星飛來京策應協助殺賊毋得頃刻稽違如遇賊寇在途把機勦殺不可怠忽有悞事機如勅星飛奉行故勅

大元四年五月十三日下

護軍都尉原奕又 勅命

皇帝勅諭都尉黃原奕

爾祇事我國家清勤公正茂著才猷今邊關稍靜嘉念爾勞特賜爾銀幣其體朕意益効忠勤以副委任故勅

特賜銀二十兩 紵絲二表裏

大元四年八月十五日下

唐

黃芮歛西黃屯園人事親以孝 聞建中初繼母洪氏病芮割股饋養而

愈貞元中父卒廬墓晝夜不絕聲遂終身不捨墓側產芝十四本木連理者四刺史盧公上其事詔旌表其門閭

制曰欽州黃芮謙行修身事親盡孝母病割股以愈疾父喪廬墓以終身彌泣之聲晝夜不絕祥異之迹遐邇咸知然而地產靈芝木生連理苟非至誠動天何由臻此

朕其嘉焉宜旌表門閭以褒賞貞節主者施行

貞元十九年二月十五日行

吏部左侍郎黃損 勅命

朕惟吏部迺衡鑑之司所以統百官而均四海侍郎亞宰相之職亦同遊姦邪兩登俊良匪得其人曷稱厥職爾禮部侍郎黃宗器之子黃損練達才猷貞白志操克懋承家之孝素存許國之忠邇居兵曹甚孚衆望茲特命為吏部左侍郎爾宜詳稽功最益秉公明庶賢否不失於淵清而爵賞罔至於冒濫

欽我命汝永弗有辭可依前件主者施行

貞元元年三月初四日

尚書左丞相

趙憬

中書侍郎同平章事

陸贄

右拾遺

王仲舒

行詞

左補闕

熊執易

宣奉

諫議大夫

楊城

告吏部左侍郎黃損奉披

制敕如右符到奉行

吏部主事

王仲義

令史蘇文亮

書令史常楷

貞字致伯貳拾陸號

貞元元年三月初四日下

梁

開府儀同三司黃叔宏 救命

奉

天承運

皇帝敕曰自古建立天下必資賢良為之輔弼所以振

朝廷之紀綱安

社稷之大計致隆平之盛世延悠久之基圖以敷化于八方斯有以也今開府

儀同三司黃叔宏賢而有德良而有才使任茲職以輔

朕之不逮汝宜承之益勵益勉恪恭厥職恪勤厥心夙夜祗祗勤向陞秩汝往

欽哉毋替

朕命故敕

貞明五年己卯八月十五日

救行 御覽

宋

禮部尚書黃何 敕命

奉

天承運

皇帝詔曰

維古者治天下必得賢臣以輔之迨今設官分職各有攸司故尚書為

朕台輔之臣左右之官今尚書黃何立心宏大德行素隆年高老耄上疏告歸

專臣方山賚金衣綉裳昭尚書之德以榮終身子子孫孫繩繩勿替汝受朕

朕承以

朕命

淳熙五年八月十五日下

敕行 御覽

工部尚書黃夢栢謝官表 出勅功

天曹蕪組謹書累月之勞

帝宸疏恩遽陟三銓之首居然就職惕尔懷慚臣某中謝伏念臣初無適時可

用之才徒有泥古不通之學握從臣之橐俯仰四方使老上之庭往來萬里
歎賢勞之何有荷

聖眷之過優旣叨少宰之除復攝冢卿之乏而臣技窮能薄景迫年侵猶騰告
老之章未動蓋高之

聽敢圖簡記反使甄陞維天官分典於銓衡而

帝伯實提其綱領頃嘗兼掌猶懼弗勝茲命顯官益虞非据弃錫身章之寵仍
頒旣乘之珍顧異政之駢蕃將何功而稱塞茲蓋恭遇

陛下規模天大睿智日躋照臨溥暨於群工禮遇尤先於近列知臣清勤有守
寒松不改於後凋憐臣氣力未衰老馬或請於蘇道乃領茂遲以及微蹤臣
謹當上體隆恩益堅晚節壯心雖在詎能久愛於捐軀來日無多終願祈求
於閒退虔肅薰沐謹表以

聞 隆興甲申五月 日具

特授朝奉大夫致仕敕牒 出樂平藍溪

奉議大夫賜緋魚袋致仕黃居信右可特授朝奉大夫

前致仕賜如故

敕朝議大夫賜緋魚袋致仕章駟等萬壽無疆

聖德方隆於慈極

一人有慶

皇恩當浹於綿區爰及崇年舉領曠澤爾早登美仕晚保令入推止足之風
身際亨嘉之會用陞華秩以侈宏休結服殊恩益昌遐紀可依前件奉
敕如右牒到奉行

淳熙十三年五月十八日下

從事郎錄事黃遇龍辭翰養親表

具官臣遇龍言伏禱

天恩

賜臣歸養不勝雀躍仰感

鴻庥者

聖人以孝經維海宇

乾坤由此清寧臣取以事親慊靈臺俯仰可希媿憾人生全在此道本出於

斯伏念臣草莽微拳濫存

逢乘之麗櫟樗殘朽幸膺

芸蕘之岑

臣遇龍

誠惶誠恐稽首頓首夙暮銘心訟竭芻蕘之一得詎當然

也險夷剝骨惟供犬馬之多艱詎敢護乎竊惟老父日薄西山嘆桑榆之

逼迫可憐孱息宦羈

上苑悼葵菲之依稀欲盡子情恐睽

寧敢欲抒臣取獲罪斑斕誠若觸藩實為狼狽臣唾肝腸者

六年萬歲臣効報之日長深涕漣者椿樹此陰子鞠躬之光少伏願

堯仁舜孝

大推愛敬以及人之親

純側坤慈

廣闢涵容以全物之命由是萬姓欣欣咸慶孝盈於世

鈔忠滿於

此辭察憚憚皆

朝廷臣無任瞻

天仰

聖激切懇測屏營之至謹庸虔薰沐奉

表辭

誠必

聞臣誠惶誠恐稽首頓首謹言

寶祐三年五月日具

元

擬除德興縣丞執牒

出樂平監漢

皇帝聖旨裏浙江等處行中書省見為勦捕邊賊事據饒州路治中祝遠壽報

到義士募民義民內一名黃忠今擬除饒州德興縣丞添設鈔此奉給降

執牒以來先行照會之任所有執照須至出給者 右執照付饒州路德興縣

丞黃忠收執准此至正 年 月 日下

授香山縣尹劉付

出德興君

皇帝聖旨裏江西等處行中書省准 都省咨 奏准遷調廣東六品以下官

員從宜擬定行省先行照會之任開具備細回咨 奏降 執牒等事准此

照到廣東道急缺又任已滿等員數省府與 都省差來官泉府司卿行御

史臺監察御史圖議擬注黃崇克後項職名除已照會宣慰司及移咨 都

省 奏降 勅牒外合下仰照驗依上先行之任經過宿煩去處依例於館

舍內安下無得取要飲食須議出給執照者 今議黃崇克香山縣尹 右

劄付黃崇准此大德元年三月 日下

大明

授典寶黃霽 救命

奉天承運

皇帝敕曰國家建王國以處夫宗支必備官僚以治其政事故茲與寶之設實

有正副之員亦必得人庶稱茲選爾申府典寶所典寶副 齊起家儒業育

俊賢關兩擢任于宗藩又分司于政務操持罔懈勞動 可無寵名以示

褒勸茲特進爾階修戎佐郎錫之救命爾其益殫乃力 乃心用耐任使

之榮以俟官階之陟鈔哉

初任壽府典寶所典寶副 貳任今朕弘 年 日

都勻府經歷循朝覲 勅命

皇帝勅諭天下朝覲官員

朕夙夜兢兢奉若

天道期康保斯民三十五年於茲矣中外百司凡有條奏朕未嘗不悉意覽裁
乃朝廷所下令百司率多慢視邇歲倭擾於南狄窺於北調兵轉餉徵輸四
方甚非獲已期爾藩臬守令殫心體國約已愛民庶可以紓百姓之急而佐
其生遂顧貪黷相效酷暴任情蔑法肆行恬不為意畏即不然者亦因仍玩
揭計日奉遷殊無修改任事之忠夫朝廷設官以為民也咸欺怠若此俾朕
獨為天下憂可乎茲當來朝已命所司考覈黜其不戒之尤者爾等既存留
還任尚其惕勵省改守法奉公勿負朕命如復怠棄官常殃民自殖憲典具
在朕不爾貸鈔故諭

嘉靖三十五年二月初六日

龍虎衛經歷黃直 勅命

奉

天承運

皇帝勅曰國家設兵衛以分理軍政其長二皆以武臣處之至於幕職亦必得
人乃克有濟爾龍虎衛司經歷黃直發身異擢今職歷歲既深克勤且
慎是用進爾階徵仕即錫之 勅命以為爾榮所益盡乃心毋怠厥職欽
哉

勅贈龍虎衛經歷司經歷黃直妻汪氏為孀人

勅曰夫婦人之大倫故朝廷推恩群臣命必及之而何間於存沒哉爾龍虎
衛經歷司經歷黃直妻汪氏克相其夫而已早沒茲特贈為孀人九泉有知
服斯榮命

成化二十二年三月十六日

勅贈黃壽康為徵仕郎 奉

天承運

皇帝勅曰國家推恩臣下必及其親

爾黃壽康乃龍虎衛經歷司經歷

有褒嘉茲特贈爾為徵仕郎龍虎衛經歷司經歷九皇

勅贈汪氏為孺人

勅曰孝子之愛親也靡有存亡之間故朝廷推恩必及之所也體其心而重

大倫也爾汪氏乃龍虎衛經歷司經歷黃直之母有子能官由爾慈訓推原

所自卹典宜申茲特贈為孺人尚克承之永貢幽壤

成化二十二年三月十六日

新安左田黃氏

亦何間於存沒哉

遂換其所自宜

斯龍命

新安左田黃氏正宗譜卷八

祭類

田黃氏祭文

於皇初之一... 田以開先鬱栢林之吉壤肇瓜... 絲曰明德之有後

金蕃衍而稱... 耀籍笏其交映佩詩禮而相傳... 紹藉餘休乎幽玄

當雨露之既... 華林愔而... 迨前迺各掃乎松楸為曩典... 師忽忽以何覩

先靈... 尚饗... 翻藹孝... 以無間諒昭假之同

縣尉公清明墓祭文

思惟我

祖立經濟之豐功恩加群庶弘併... 之大庇德裕

上聞三徵縣尉鴻基大構肇居左... 几我庶孫

於衷懷而怵惕之思每有感於春... 陳

之念惟恒切

...

...

尚饗

星洲祭縣尉公文

仰惟我

祖令德垂無窮之聞陰功照累洽

崇三守閩門至今傳頌乃拓父大

實為萬世之幽宮借我

祖妣德音攸同乃今蕃庶於休寧 是原左田之衍茂于西

于人口于星洲山為一派惟我孫等寔為星洲仰我

祖考大德惟 報之無由履春雨而休惕感霜露而

之念懷彼柏以難禁之始之恩緣雲山之既隔表

感慕牲醴遠用表追思伏惟

尚饗

大明 歲次庚子 春二月清明日裔孫黃槃黃鈇等謹祭

祭忠烈黃公觀文

周良會

防思擬耳
林之佳莖

戒同出一源

白雲輒興如在
帶是屆清明尤增

二五

章之斗

浩浩平

不動此遷仰

既清擇勝惟越

之華靈也

而西

之

之

之

之源

是又

之從

之靈

之靈

有承浩然之氣善養而魁天下人徒知其為文

是又 恢出一清流之鈞黨忠義好淳平塞于肺肝風聲

之從 各作永首陽之孤 同賞于 大為 祀有視聽者靡

之靈 靈安只庶 誠發而與醴醴

之靈 靈安只庶 誠發而與醴醴

終

黃氏

18

